

С(коми)

№ 96

ГЕННАДИЙ ЮШКОВ





95  
99

285331

# ТЫРА ПЕСТЕРА

- КЫВБУРЪЯС
- СЫЛАНКЫВЪЯС
- ВИСЬТЪЯС
- МОИДЪЯС
- НОДКЫВЪЯС
- СЕРАМТОРЪЯС
- КЫВПЕСАНЪЯС

Коми республиканская  
ДЕТСКАЯ БИБЛИОТЕКА  
имени С. Я. Маршала

С (Коми)  
Ю 86

Серпасьясыс В. Г. Игнатовлӧн

КНИЖКА  
ЧЕЛОВЕКА



## ГӨРД ФЛАГА МУ

Қылө сьыланкыв гор,  
Абу сьылөмыс нор.  
Лөсьыд челядылы тан,  
Налөн шудныс оз ям.

Медым шоглун эз су,  
Видзө гөрд флага му.  
Видзө-төждысьө сідз,  
Ленин шуөма кыз.

## ШКОЛАӨ

Өти-мөд бөрся  
Поснияс уна  
Первойысь таво  
Школаө мунам.  
Тэрмасыам быдөн,  
Сөрмөмысь полам.

Кыпыд да мича  
Со миян школа.  
Артасыны, гижны  
Велалам бура,  
Миянысь шуда  
Код талун сюрас!

## ДРУЖБА

Кор чукөстис Ленин,  
Мед перйыны шуд,  
Став нартитөм венны  
Сэк коді эз сувт!  
И войвылын, тані,  
И лунвылын, сэн,  
Голь войтырыс паніс  
Сэк өтувъя вен.

И лөкөн код воис,  
Сэк бурөн эз мын.  
И дружбаыс лоис,  
Кыз медыджыд вын.  
Ми дружба жө панам,  
Мед некор оз кус:  
Өд шусьө странаным —  
Сөветскөй Союз!

## ПИОНЕР

Тайё кывйыс быдёнлы оз лёсяв,  
Сёмын сылы, коді абу нэр.  
Ичётсяньыд колё овны пёся,  
Медым збыльысь лоин Пионер!  
Пионерён лоны абу кокни:  
Ыджыд туйё дасьён вёлін мед.  
Сэк оз падмөд тэнё мудз ни, шог ни,  
Шуд да вермөм усяс сэки тэд.

Пионерыд — сійё водзын мунысь,  
Сійё некор сьёкыдсьыд оз пов.  
Пионерлы нимкодь локтысь луныс,  
Сы вёсна мый веськодя оз ов.

Пионер кө — ломав, а эн чискы,  
Синтё моз жё югыд нимтё видз.  
Тэнад могыс лоны коммунистён,  
Кыдзи коркө чуйдыліс Ильич!

## МЕНАМ ЭМӨСЬ ЁРТЪЯС

Миян классын зон и ныв  
Письмөасьё ставыс.  
Со и талун воча кыв  
Воис мен Москваысь.

Оз ков чолөмыдлы борд,  
Оз кут зэр ни пемыд.  
Эм Болгарияын ёрт,  
Венгрияын эм и.

Эськө быдён олам ми  
Аслас чужанінас,—  
Миян дружба, быттё би,  
Коді кыскө дінас!



## МИ — ОКТЯБРЯТА

Медся посниось ми татён,  
Школа кодяс.  
Но ми ветлам нин отрядён,  
Миян нимным — октябрията —  
Со ми кодяс.

Отвылысь ми ставён олам,  
Отсасьёмён.  
Ыджыд уджным миян — школа,  
Кёни велёдчыны колё  
Бура сёмын.

Морёсаным кодзув öзйö  
Зарни серён.  
Оз ков сёянтор моз вöзйём,  
Быдён водзö лоны кöсйö  
Пионерён.

## СИЙÖ ВАЙИС ПОБЕДА

Шонтö шондйыс бура,  
Гөгөр веждö сад.  
Отнас копыра юра  
Изйысь вöчём салдат.

Вая сылы ме дзоридз,  
Сэсся сулышта чöv.  
Сылён олöмыс ори,  
Кор ме эг на и вöv.

Чужан му вöсна муніс  
Врагкөд вövлытём кось.  
И — мед подвигыс вуніс,—  
Некыз, некыз оз позь!



Сійö бойысь эз петав  
Сэки нель сьöкыд во.  
Сійö вайис Победа,  
Кöть и ачыс эз ло.

## ГРАНИЦА

Кыті вöра, кыті виддза,  
Кыті ёль да рас.  
Кузя нюжалö граница —  
Чужан мулön тас.

Ывла вылыс быттö узьö,  
Некön пон оз увт.  
Сöмын пондыв локны гусьön,  
Пыр и кылан: «Сувт!»

Öткодь туй пом ставсö суö,  
Коді вайö лёк.  
Сэтшöмыслön мян муö  
Мед оз тувччы кок!

Сэтшöмыслы тан оз вичмы  
Гуся ордым-вöнь.  
Сюся видзö пограничник  
Чужан мулысь лöнь.

## ЛЕНИНЛÖН ГÖСНЕЧ

Ёгорушка садьмис пöлатяс, кöні век узьліс. Сійö ті-  
льыштіс ки мышнас унзіль синъяссö да бöрддзис.

— Мый нö бöрдан?— юаліс пачводз дорсянь мамыс.

— Қынöмöй сюмалö. Нянь вайышт.

— Час, дона пи, час.

Ёгорушка дугдіс бöрдны. Сідзкö, мамыс водзöсалöма

кыськө пызь да көсйө пөжавны нянь. Дерт, кач сорөн, мед унджык лоө. Ок, кутшөм мустөм сэтшөм няньыс Ёгорушка-лы! Мый нө, пөтны он пөт, а сөмын кынөмыд висьө.

Но нинөм он вөч, быть сөй. Тшыгнад овны абу жө любө.

Керкаын друг кутис кывны пөсь нянь дук. Сийө эз вөв сэтшөм, кутшөм овлө сора няньлөн. Ёгорушка азыма кыс-кыштіс нырнас, нюжөдчис пөлать дорө да видзөдліс улө. Бергөдөм пызан вевт вылын куйлісны банийөм шаньгаяс. Насянь кайис кельыд ру.

Ёгорушка өдийө вуджис паччөрө, валегиасис сэні да чечыштіс джоджө. Мамыс видзөдліс сы вылө да шуис:

— Мыссы да вөлись.

Ёгорушкалы зэв эз вөв окота мыссынысө. Сийө весиг дузмунлі. Но мамыс эз веж ассыс кывсө. Қовмис мыссыны.

— Позьө, мамө?— зіля чышкис чужөмсө да матыстчис пызан дорө Ёгорушка.

— Вот өні позьө,— меліа нин вочавидзис мамыс.

Ёгорушка бөрийс медся паськыд шаньгасө, ыджыда курччис сэтысь. Торйыс вөлі сэтшөм чөскыд, мый нямляліс да эз дзик пыр нылышт, а видзыштіс кыв йылас. Та бөрын чупкөдігтыр сөйис шаньгасө дзоньнас.

— Ме мөдөс, мамө, босьта. Но?

— Босьт, босьт,— тшөктіс мамыс.

— А кысь миянлы та мындаыс, мамө?— юаліс Ёгорушка сөйигмозыс.

— Тайө... тайө Ленин дядя тэныд гөснеч ыстөма. Помнитан, исполкомад сийөс петкөдлісны? Стенас тай, рамка пытшкын?

— А-а, помнита,— шуис Ёгорушка.— А сийө нө төдө менө?

— Сийө став челядьсө төдө.

— Дзөля Коляөс и?

— Да.

— Степан Нинаөс и?

— И сийөс тшөтш.

— Дзик ставсө?

— Дзик ставсө нин, буракө.

— Вот тайё Ленин дядя!— шензис Ёгорушка.

Пөттөдзыс сёйис сійё Ленин дядялысь гөснечсё. Обедайтны весиг эз кут. Пасьтасис да петіс ывлаё. Сьёрсыс босьтіс ещö öти шаньга, мед ошйысьыштны ёртъясыслы.

Вичко шор йылын, кытчö веськөдчис Ёгорушка, тыдалісны нин челядь. Найё сулалісны мышкөн да эз казавны сылысь локтөмсö.

— Со! Ленин дядя ыстөма!— горөдіс Ёгорушка да мыччөдліс шаньгасö.

Челядь бергөдчисны, видзөдлісны шаньга вылас, но ньöти эз чуймыны.

— Миянлы, чайтан, эз ысты? Со!— шуис Дзöля Коля да петкөдліс сера дора гөгрөс көлөб.

Ёгорушка кыйкнитліс öтарö-мөдарö. Быдөн мыйкө кутісны кианыс: коді шаньга, коді көлөб, коді кызку. А Степан Ниналы Ленин дядя ыстөма пувъя пирөг.

Ошйысьны лои нинөмөн. Ёгорушка лэдзис юрсö. Челядь сералісны сы вылын, но эз лёкысь. Сэки и аслас Ёгорушкалөн серамыс петіс.

Пансис сёрни. Ошкисны Ленин дядяös гөснечьяссö ыстөмысь, сыысь, мый некодös абу вунөдöма. Сэсса сёйисны Ленин дядялысь гөснечьяссö да кутісны ворсны. Ворсісны кутасьöмысь. Налы вöлі зэв гажа.

И некод эз төд, мый тайё гөснечьяссö пöжалісны налөн мамъясныс асьныс. Тöрыт сёрөн нин сиктас вайисны карысь шобді да юклісны гöля олысьяслы. Мамъясыс войнас изісны сійöс ки помысь да асывнас пöжалісны, коді мый көсйис. А шобдісö карас збыльысь ыстіс Ленин. Сылы кывсяс, мый Комиын тшыгъялöны, да пырысьтөм-пыр жö тшöктас отсавны коми йöзлы.

А вöлі тайё зэв сьökыд кадö — 1918-өд воын. Öнія шуда олöмыс сэки сöмын на сувтіс миян му вылын. Озыръяслысь нартитөмсö вöлі нин уськөдöма, но найё эз на көсйыны сетчыны бурөн, водзсасисны. И Ленин ёрт юрнуөдөм улын голь войтыр венісны да венісны найöс. Воюйтіс выль олөм пондасы и Ёгорушкалөн батыс.

А öні ачыс нин Ёгорушка олöма морт. Быдмис да велөдчис, уджö босьтчис. Вөр лэдзис, из шом перйис, көрт туй ню-



жөдіс Коми му кузяла, заводъяс кыпөдіс, нефть да газ кор-  
сис. Некор весь эз овлы, и öні оз. Медтыкө бурөс вöчны йö-  
зыслы, кызди и Ленин.

Но гөснечсö Ленинлысь век помнитö, некор оз вунöдлы.

## СЕРЖАНТ САЖИН

### 1

Милицияса сержант Иван Сажинлы звöнитісны да тшök-  
тісны лоны дасьön петны туйö. Вит минут мысти пö локтас  
тіянла автомашина да нуодас аэропортö, сэні пö виччысьö  
нин самолёт Як-12. Ковмас пö лэбзыны Кыръя сиктö. Вошö-  
ма пö вит арöса нывка Надя Самарина.

Сэтшөм нин сержант Сажинлөн уджыс: оз-оз, сэсся друг  
кытчökö чукөстöны. Лөкторйыд тай век виччысьтөг лöö да  
кывсьö.

Но Иван Сажин оз элясь татшөм удж вылас. Сылы, вöv-  
лөм пограничниклы, сьölөм сертиыс, кор колö öдийö кодөскö  
туявны, мед лөк вöчөмсьыс эз мын, а бур йöзыслы отсавны.  
Сійөн и вöйысис милицияас, воис армиясьыс да.

Вöйысис эз кытчö босьтасны, а понъяс дінö. Тадзи ачыс  
и шуис:

— Ме эськө, позьö кө, понъяс дінö... Ме накөд кужышта  
нин уджавнысö.

Ошйысьнытö абу лөсьыд, да сы вöсна Сажин и шуис  
«кужышта».

— Мыйла нö оз позы!?— вочавидзисны сылы.— Да и ко-  
лö миянлы сэтшөм мортыс.

А медым бур туясян пон быдтыны, абу на и кокни. Оз  
на ачыс сэтшөм понйыд быдмы, сöмын пөттөдз вердöмысь.  
Ок, кутшöма на колö сійөс велөдны, да мед эськө и бур рö-  
дысь вöлі, ёсь ныриса.

Том пон, кодөс аслыс вылө бөрйис Иван Сажин, бур рö-  
дысь и вöлі, бур «бать-мамлөн»: кузь да кодзыд ныр-вома,  
топыд да зэлыд шошаа, косньöд да пельк. Сöмын шуйга водз

кок вылас ляпмунліс котрөдлігас. Вөлөмкө, доймылөма: зэв нин вылісянь чечыштөдөмаоьс. Мукөд понйыс повзёмаоьс да абу чечыштөмаоьс, а сійө чечыштөма. И таысь сэсса быттьө и мыжмөма: лыддисны сійөс шогмытөмөн нин.

Но Иван Сажинлы воис сьөлөм вылас буретш тайө том понйыс. «Асламөн» сэсса и нимтіс сійөс.

Медводз Сажин шойчөдыштіс Асламсө, эз песөд весьшөрө сылысь доя коксө. Пыравліс Аслам дінас сідз пукалыштны, пель сайсө сылысь гыжйыштны.

— Час, бурдлам на,— вомгорулас шулывліс Сажин, и Аслам сылы вочасөн кутіс эскыны, меліа шпыньөдліс пельяссө, вөрөдіс кыз бөжнас.

Аслам дзикөдз бурдіс, зіля котраліс да чеччаліс, туясис, пöрысьджык поньяслы весиг эз кут сетчыны ныриснас.

Сэсса коркө и Сажин да Аслам медводдза «удж» вылө мунісны, войын лавка ректысьясөс корсьны. И корсисны да кутісны. Аслам некытчө эз сорассьыв, вайөдіс кытчө колө.

Артыштны кө өні ставсө, мыйта нин бурсө Аслам вөчис, мый дон нин бөр бергөдіс гусявлөм эмбурсө, но коді нө кутас артасьны?! Сэтшөм нин налөн уджыс — милицияса сержант Иван Сажинлөн да Аслам нима овчаркалөн.

И друг кө бара корөны кытчөкө Сажинөс, колө гөгөрвоны, мый корөны оз өтноссө сійөс, а Асламыскөд.

## 2

Ичөтик да кокныдик Як-12 самолёт лэбис карсянь Эжва катыд, весьтасавліс ю чукыльяссө, тэрмасис Кырья сиктө. Лөза-вежа шыльквидзис улын вөр-ваыс. Тувсов ытваыс усьны нин кутөма да тыдалісны тшөтш и чепөсйөм туруна видз бөжъяс.

Сажин пукаліс лётчыкыскөд орччөн, а на бөрвылын куйліс Аслам. Сійө лыбөддывліс юрсө да никөстывліс. Некор на сійө эз пуксьыв самолөтад, да поліс лайкнитлөмсьыс, көнкө, чайтіс, мый вот усясны.

Часөн-джынийөн кымын лэбисны, воисны Кырья сикт весьтө. Тані вөлі ичөтик аэродром. Сэтчө и пуксисны.

Сажинлысь воөмсө төдісны нин, да тырыс йөз локтісны самолёт дінас, дерт, тшөтш и вошөм нывкалөн бать-мамыс.

А сиктад век сідз: кытчö йöз, сэтчö и понъяс. Найö медся шумсö и вöчисны, Аслам выlö кутісны увтны. Но Аслам эз шыасьлы воча, сöмын эрыштавліс гусьöникöн. Öти-кö, сійö вöлі удж вылын, некор сылы, а, мöд-кö, сійö вежöра пон, абу на кодь ывла шызьöдысь.

Мунісны Самаринъяс ордö. Сэні Сажин водтöдіс Асламös да домыштіс пызан кокö, дерт, мода вылас, а ачыс кутіс юасьны Самарин гозъялысь кыз-мый лои. Мукöд йöзсö Сажин эз лэдз пырны.

### 3

Тöрыт рытладорыс вошöма Надя Самарина, вит арöса нывка. Öтпöлöса, дзик öти платтьö кежысь.

Бать-мамыс да гырысьджык чой-вокыс мунасны картупель пуктыны. Надяös тшöтш нуодасны, мед пö сэн межаас ворсас, öтнассö оз лысьтны гортас кольны.

Вöv бöрся пуктысясны, гөрöмөн. Батьыс гөрö, а мамыс да чой-вокыс пуктысьöны.

Надя вöлөм котралö, вижъяур межасьыс öктö, петкöдлыны мамыслы волас дзоридз ки тырсö. А сэсся кытчöкö вошö. Абу и абу.

Став сиктнас нин сійös корсясны, горзасны-чуксаласны. Важ юкмöсьяс, сей гуяс, пывсянъяс видлаласны — некысь оз сюр. Бытьö вöлі и сылі.

А муыс, кытчö картофельсö пуктісны, вөр дорын матын. Пожөм сора коз понöль сэні дорланьыс быдмö, сэсся вöрыс пыр гырысьмö да пемдö, сöмын пес керасьяс волöны.

Корсясны и вöрсьыс, оз жö сюр.

Но öд морт воши, тадзи он энөвт. Юöртасны районö, сэсянь карö.

И шогыс абу сöмын бать-мамыслы да чой-вокыслы. Быдөнлы та ыджада шогыд инмö да мөрччö, көть эськö синванад и он отсав.

Öти надея нин и кольöма: оз-ö понійөн кыськö сюр, ловъя ли кулöма.

Батьыс кутчысис на кутшöмакö, сöмын дөрөм морöссö öні Сажин водзын някраліс, а мамыс и сыркмуңлі-бөрддзыліс висьтасигас.

Дерт, эз дыр Сажин юась. Коліс вöчны мыйкö, кысянькö пондыны корсьны.

Сажин исöдiс Асламлы Надялысь ичöтик ковтасö да нöшта мыйсюрö.

Ковтасö сэсся Сажин босьтiс сьöрсьыс, сы вöсна мый Надя сийöс тöрыт на пасьтавлöма.

Мунiсны му вылö. Сажин бара исöдiс Асламлы Надялысь ковтасö да тшöктiс корсьны.

Аслам котралыштiс межатi öтарö-мöдарö да вöрлань нырөн зэлöдiс домсö, нетшыштöмөн кыскыштiс ас бöрсяыс Сажинöс.

Со нин джуджыд вöрö найö пырисны, пес чипас дiнö волисны, сэсся кодзувкоткар дiнö. Со нин туй ни ордым оз тыдав некөн. А Аслам кыскö и кыскö Сажинöс, котöртöдö ас бöрсяыс.

Вöрад ылавны абу сьöкыд. Гырысьяс на ылавлöны, оз гөгöрвоны, кодарö колö петны. Шулöны тай: юр вежöрыд пö бергöдчö, мöдарö мунсьö. Тадзи жö, тöдöмысь, и лои Надякöд. Пырис ворсiгмоз вöрас, öтилаö-мöдлаö волис, водзö на окота лои ветлыны, а сэсся и ылалис, воштiс туйсö.

Кöни вот эськö öни сийö? Гашкö, абу нин и ловъя? Мудз-тöдзыс мунiс да мунiс, а сэсся кытчöкö куткыртчис. А войыс ыркыд вöлöма.

Сажинöс шог босьтлö татшöм мөвпсьыс. Эбöсыс весиг бырыштлас, лолыс тырлö.

Но оз позь сылы сетчыны шогыслы. И Сажин котöртö да котöртö Аслам бöрся, сы моз жö чукльöдлö.

— Бе-бе-бе!— друг кыліс жбырмунöм. Байдög вöлöма, еджыдгöрд сера öни. Аслам сувтліс да эрыштліс сы вылö: повзöдчан пö.

А байдögьясыд гожöмнад нюр вылын олöны, васöдiнын. Сажин пыр и вежöртiс, мый васöдiн, сiдзкö, воö.

Вутшкось да нюйтось восьсаин сэсся и воис. Кок туйыд пыр и бöр шылясьö. Мунан, да быттьö абу и мунöмыд.

Аслам падмыліс, öтарö-мöдарö сетчыліс, сэсся нориника никöстiс.

— Аслам, корсь!— шуис Сажин да личодыштіс домсө. Чукльөдлөмөн вуджисны васөдінсө, виж нитшка да по-жөма вөр воис. Вөр пөлөныс и веськөдіс Сажин понсө. Од вуджис кө быттьө Надяыс тайө васөдінсө, нитш вивсьыс сы-лөн кок туйыс Асламлы бөр сюрас.

Муныштісны мыйтакө вөр пөлөныс, и Аслам зэлөдіс домсө, вылө лэптылөмөн лют-лёт вөчис кыз бөжнас: сюри пө.

Бара Сажинлы ковмис котөртны да котөртны Аслам бөрся. Пөсьыс Сажинлөн тюрөбөн нин чепөсйыліс юрсьыс, и сапөга кокъясыс сэтшөма сьөктаммисны. Көть сувтлы да лолышт, а то и пуксьыв.

Но некор. Ыджыдысь-ыджыд мог налөн Асламкөд, и ко-лө тайө могсө збыльмөдны.

А Аслам пыр зэлөдө и зэлөдө домсө, нетшкысьө, ник-сышталө: матын пө нин, лэдз. Сэсся тай кызд нетшыштчис.

Сажин лэдзис. Аслам пыр и вурьштіс веськыда, эз нин туясь весиг. Здук-мөд коли, и увтөм сылөн кыліс: тані пө.

Мудзыс Сажинлөн быттьө эз и вөв. Қос ув вожъясьыс да лыс лапъясьыс синсө видзигтыр уськөдчис увтөм вылас.

Йөжгыльтчөма, куньса синьяса, өтпөлөса, куйлө пожөм улын Надя, а сы дінын Аслам, бөжсө легөдө. Татшөмтор ад-зис Сажин, воис да.

Надя ловъя на вөлі, но мудзысла, тшыгйысла да кынмө-мысла эз нин кыв нинөм. Сажин босьтіс сійөс мездорас, ту-быртис ковтанас, а сэсся сайөдіс аслас паськөмнас. И өдйө-джык бөр сиктө.

Нимкодъыс вөлі Самарин гозьялы и быдөнлы сиктас, кор Сажин вайис Надяөс, ловьяөс на.

Дерт, ковмис на бурдөдны Надяөс, төждысьны сы пон-да, но медся ыджыдторсө вөлі нин вөчөма.

— Сө пасибө жө нин, бур мортөй!— нимкодъысла бөр-дігтыр аттьөалис Надялөн мамыс.

— Аслыд, сержант өрт, и понйыдлы!— сьөлөмсянныс содтіс батыс.

— Нинөмысь,— вочавидзис налы Сажин да малыштіс Асламсө.



## СӨСТӨМ ДӨРӨМ

Мамыс пасытөдiс Васяөс сөстөм дөрөмөн да шуис.

— Талун өд он нин мун трактор дiнад?

— Ог,— нурбыльтiс Вася.

— Гораа шу «огсө»,— тшөктiс мамыс.

— Ог,— гораджыка вочавидзис Вася.

Мамыс эскана видзөдлiс сы вылө да ачыс восьтiс керка өдзөссө. Вася тэрыба петiс ывлаө.

Төрыт сiйө лунтыр гуръясис трактор вылын. Трактористыс, Ёгор дядьө, весиг лэдзлiс кутыштны рычагъяссө, кодъясөн веськөдлөны. Локтiс Вася гортас рытладорыс. Зэв өдйө пөрччис сьөдасьөм дөрөмсө да дзедис крөвать улас. Мамыс кутiс чышкыны джоджсө да казялiс. Юалис Васялысь, көнi татшөма няйтөсьтiс. Ковмис висътавны. Мамыс көсйис някыртны Васяөс юрсiөдыс, но сiйө удитiс кайны паччөрө. Сэсянь и кывзiс мамыслысь видчөмсө.

Керкаяс сайын, ыб вылын, кылiс трактор шы. Корсюрө тыдовтчылiс и ачыс тракторыс. Сы бөрся вөтлысисны ракаяс да скворечьяс.

Васяөс кыскис сэтчө жө, но эз лысьт муннысө. Сiйө кайис потшөс вылө да асьсө ылөдлiгмоз кутiс видзөдны мөдлапөвлань. Нинөм вылыс эз тыдав сэтысь: видзьяс шыльквидзисны жө, вөрыс сулалiс сэтшөм жө.

А трактор заводитiс муравны нөшта ёнджыка, быттьө дэльөдiс Васяөс, ышөдiс локны. Төдлытөгыс Вася ньөжйөнник бергөдчис ыблань чужөмөн.

— Бара нин трактор дум вылад?— горөдiс мыш саяс мамыс, кодлысь петөмсө Вася эз кывлы.— Мунлы сөмын!

Зонка чөв оліс, эз шыась. Мамыс сулалыштiс да мөдөдчис удж вылө.

Вася лэччис потшөс вылысь, лэптiс муысь чаг, шыбитiс сiйөс. Мөд чаг лэптiс да шыбитiс. А коймөдысла дыш нин лои копыртчывнысө.

Трактор шы вочасөн шымыртiс Васяөс. «Муна да вөзйыся кө, Ёгор дядьө эськө бара орччөн аскөдыс пуксьөдас, веськөдлан рычагъяссө лэдзлас кутыштны, гашкө, ачыс ве-

сиг сэки мынтөдчылас. А дөрөмөс ог съөдөд дай!»— мөвпыш-  
тис Вася. Тайө мөвпыс и вөрзөдіс сійөс местасыс.

Ёгор дядь казяліс Васяөс да сувтөдіс тракторсө, мыччы-  
сис кабинасыс:

— Бара локтін? Мамыд төрыт эз вид?

— Эз,— копыртис юрсө да вочавидзис Вася.

— Но, эз кө, и бур!— шуис Ёгор дядь.— Пуксы.

Мөдыс тшөктөм Вася эз виччыс, өдийө кайис трактор  
вылө, пырис кабинаас да пуксис Ёгор дядькөд орччөн. Ёгор  
дядь нюмъөвтис сылы да вөрзөдіс тракторсө.

Муракыліс-ветліс ыб кузя трактор, корсюрө небыдика  
нетшыштчывліс. Куим амыся гөр вөтлысис сы бөрся, куим  
визьөн гугөдіс лым улыс петөм руд мусө. Чим съөдөн дзир-  
дыштлис шонді водзын гөрөминыс, өткымынлаті весиг лөста-  
ліс, быттьө выя бордйөн нуөдөмаөсь. Вералис гөрөм му весь-  
тын сынөдыс, гы ва моз лайкъяліс.

Төрытгы моз жө Вася гусьөник нюжөдіс кисө да тшөтш  
кутчысис матыс веськөдлан рычагас. Ёгор дядь казяліс, но  
нинөм эз шу.

Рычагыс вөрис, быттьө мынтөдчыны зілис Вася кийс.  
Вася кутис чорыда, сөнъясыс килутш дорас весиг польдчыш-  
тисны зэлаләмысла. Кыліс, кызди вочасөн мудзис да съөктам-  
мис кийс.

— Оз өд пышйы, эн сэтшөма кут!— доровтис Васялань  
юрсө да сералигыр шуис Ёгор дядь.

Вася личөдыштіс кабырсө. Пыр жө төдчымөн кокням-  
мис кийс, вөснялісны килутшдорса сөнъясыс.

Дерт, эз Вася веськөдлы тракторнас. Қор ковмыліс,  
Ёгор дядь ачыс кыкыштлис веськөдлан рычагьяссө. Но Ва-  
ся сюся кыйөдіс Ёгор дядьлөн кияс бөрся да, мый удитліс,  
тшөтш отсавліс.

— Көсьян веськөдлыштны?— друг юалис тракторист.

— Көсья!— радпырыс ышловзис Вася.

Ёгор дядь паськөдыштіс кокьяссө, сэсся босьтис Васяөс  
кыкнан киняулөдыс да пуксьөдіс пуклөс вылө ас водзладо-  
рас. Вася пыр жө кутчысис веськөдлан рычагьясас.

Трактор ньөжмөдыштіс өдсө, сэсся бөр өддөдчис. Быт-

тѣо кык дѣра, помтѣм, лѣз рѣмаѣсь, люзьгисны и люзьгисны му вылѣ гусеницяясы. Ѳдйѣ матысмис ыблѣн помыс.

Вася шѣйѣвоши, мыш кузяыс йирмѣг котѣртис. Мый вынсыс чабыртис веськѣдлан рычагъяссѣ, куткыртчис: тыдалис нин ыб помын ваѣн тырѣм джуджыд гуран.

— Асланыд кыкышт! Веськыдладорсасѣ асланыд!— горѣдис Ёгор дядь.

Вася эз вѣв сѣкыд пеля, велалис, но повзѣомысла шѣйѣвоши да кыкыштитис асланыс шуйгаладорса рычагсѣ. Трактор сыркмунли, ыръянитыс вѣв моз шыбитчис шуйгавыв. Сйѣ жѣ здукас Ёгор дядь кутчысис веськыдладорса рычагас да бѣр веськѣдис тракторсѣ, а сѣсся бергѣдис.

Вася чайтитис, мый Ёгор дядь вѣтлас сйѣс да водзѣвылѣ матѣ оз сибѣдлы. Ас вылас скѣрысла ѣна доймытѣдз курчис улыс вом дорсѣ.

— Тѣкѣтѣо кѣ, пышйис миян тракторыд!— серам сорѣн шуис Ёгор дядь.

Васялѣн личали быдѣн сѣлѣм вылас.

— Сорасси ме,— яндысис сйѣ.

— Абу дивѣ! Он ѣд ме моз кызь во уджав,— кайтыштитис Ёгор дядь.

— Но, веськѣдлы! Гѣрѣм вылас со тракторыд пырѣ.

Вася кыкыштитис асланыс шуйгаладор рычагсѣ, и трактор бѣр петис гѣрѣм вылыс, кутис мунны веськыдладор гусеницяяснас бѣрѣзда кузя.

Некымын кытшов вѣчис Вася. Корсюрѣ Ёгор дядь тшѣтш кутчысьлис веськѣдлан рычагъясас. Сйѣ полис на лѣдзны тракторсѣ ѣтнас Вася вылѣ.

Вася зѣв ѣна кѣсийс, мед эськѣ аддзылис кодкѣ челядь пиыс сылыс тракторѣн веськѣдлѣмсѣ, но некод матын эз тыдав.

Кор зонка мудзис, тракторист бѣр пуксѣдис сйѣс аскѣдыс орчѣн.

Пуклѣсыс небыда лайкъялис. Васяѣс вугыр босьтитис. Сйѣ доровтчис кабина пельѣслань да чѣскыда унмовсис. Нинѣм эз торк сылыс унсѣ — ни пуксѣн узѣомыс, ни тракторлѣн гора шыс.

Садьмис Вася да чуймис: тракторыс сулалө, а кабинаас сійө өтнас. Видзөдліс трактор пөлөн, аддзис Ёгор дядьөс, коді кималасасис моторас.

— А-а, садьмин?— шпыньмуніс Ёгор дядь.— А ме, аддзан, мыйта тэ узигкості гөри!

— Мый нө лои?— юалис Вася да чеччыштіс муө.

— Нинөм! Помала нин!— өвтыштіс кинас да вочавидзис Ёгор дядь.— На, кутлы!— мыччис Васялы квайт пельөса нейджыд гайка да ичөтик болт.

Босьтігмозыс жө гайкаыс да болтыс вильснитісны кисьыс. Мед эз усьны муө, Вася зэв өдйө лөсьөдіс мөд кисө да топөдіс морөс бердас. Сэтысь сэсся и шамыртіс. Любө весиг лои, мый эз уськөд. Но видзөдліс морөс вылас да муртса эз бөрддзы: маслөөссьөм дөрөмыс лөсталіс веж рөмөн.

— Вай,— корис Ёгор дядь гайкасө да болтсө. Сійө пыр жө аддзис да гөгөрвоис, мыйла Вася жугыль.— Аттө, маслөөсьтөмыд тай дөрөмтө!

— Мед,— шуис Вася да мырдөн сорөн вөчліс серамбана чужөм.

— Абу эськө мед да! Лоөма нин, да сійө-а!— вочавидзис Ёгор дядь.

Тракторсө лөсьөдөм бөрын сійө вөчис нөшта некымын кытшов, сэсся лэччис пажнайтны. Вася лэччис ськөд.

Керкаясыс Ёгор дядьлөн да Васяяслөн пөшти орччаөсь. Та вөсна дзик горт дорөдзныс найө локтісны өтлаын.

Вася мөвпыштіс: пыралас гортас да сөйыштас, сэсся босьтас майтөг да лэччас ва дорө, пєслалас сәні дөрөмсө; рыт кежас дөрөмыс косьмас, мамыс нинөм оз и төдлы.

Но мамыс буретш вөлі гортас: пукаліс өшинь дорас да панясис. Сійө водзджык казяліс Васяөс, петіс паньд кильчө вылас.

— Ой-ой-ой! Кутшөмөс бара дөрөмсө вайө!— шуис мамыс да швачкис бокьясас кияснас.

— Ме өд эг нарошнө,— шай-паймуні Вася.

— Нарошнө көть эн!— горөдіс мамыс.— Ок, өна и нөйта талун!

— Энлы, энлы, Парук!— шыасис Ёгор дядь.— Нөйтнытө век удитан. А вот колө-ө нөйтны?

— Юрöдыс оз-ö ков таысь малыштны?— содтöд скöр-мис Васялөн мамыс.

— А, гашкö, и колö! Тэнад пиyd уджö босьтчысь! Мöдысь, гашкö, кутшöм механизатор лоö.

— Ог тöд, мыйкö таысь лолö оз,— ыджыда ышловзис Парук.

— А ме шуа: лоö!— чорыда тöдчöдiс Ёгор дядь.

## ЧЕРИ

Витя гудыртö гöп. Посни черияс кольчöмаöсь сэтчö ту-лыснас, ва усигас. Öнi найö чутмунлöны-зурасьлöны Витя-лөн кокъясас.

Тöрыт сийö гудыртiс жö öти гöп, кык ыджыд ки тыр кы-йис черисö. Талун асывнас мамыс пöжалiс черинянь. Пажун дырйи сейисны эня-пия тайö чериняньсö.

— Со öд пий менö чериөн нин вердö!— ошйисис мамыс йöзыслы.

Витялы зэв нимкодь лолi.

Но öнi сийö жугыль, завидь синъясөн видзöдлывлö вере-тя вылö. Сэни чöвтöны ыджыд зорöд. Челядь ваялöны сэтчö юръяс, панласьöны öта-мöдныскöд, збойджыкъяс весиг ньöръялöны вöвъяснысö. Гөнитигас горзöны, быттьö кодкöдкö водзсасьны мунöны. Витялы окота жö юрсö кыскавны, но бригадирыс, Семö дядьö, оз сибöд: ичöt пö, усян пö вöв выв-сьыс да дойман.

Гöптын ваис гудырмис: содз и босьтан, а ки пидöсьясыд оз нин тыдавны. Черияслы сьöкыд лои лолавнысö, вылын юрөн кутiсны ветлöдлыны ва веркösöдыс, Витя лöсьöдчис кы-явны. И буретш сэк кодкö чукöстiс сийöс. Витя эновтчис кы-лöмсьыс, видзöдлiс. Зорöд дорсянь öвтис сылы кинас Семö дядьö, корис сэтчö. Зонка öдийö петiс гöптысь да котöртис ве-ретья кузя.

— Аддзан кымöрсö?— индiс енэжö Семö дядьö.

Вөр сайсянь кыпöдчис сьöд кымөр, джоджö кисьтöм ва моз паськалiс енэжас.



— Аддза,— вочавидзис Витя.

— Зэрмытӱдзис колӱ йылавны зорӱдсӱ,— висьталіс Семӱ дядьӱ.— Со Қарко прӱст сулалӱ. Пуксы да тшӱтш кыскав юрсӱ. Верман он?

— Верма!— радпырысь эскӱдіс Витя. Ачыс поліс: а друг кӱ бригадирыс бӱр вежас думсӱ?

Зонка тӱрыба кавшасис Қарко вылӱ, тракнитіс сермӱд поводсӱ. Қарко эз вӱрзьи, сӱмын видзӱдліс син пӱвнас.

— Но!— горӱдіс Витя да ӱвтыштіс поводнас ӱтарӱмӱдарӱ.

Вӱрзьюмӱн тшӱтш Қарко мӱдіс гӱнечӱн. Витя повзис, кутчысис вӱвлы бурьяс. А паньд локтісны вӱлаяс — челядь вайисны юрьяс. Мед не янӱдны асьсӱ, Витя топӱдіс мьи вынсыс кокьяссӱ да мынтӱдчис бурьысысь. Эз усь. Долады ышлолаліг, гӱнитіс водзӱ.

Вит турун юр вайис Витя, эськӱ унджык на удитіс зэрмытӱдзис, но эз коль сӱсся юрыс.

Чӱвтысыяс зілісны, коді кутшӱма вермис. Войтасыны заводиттӱдзис на эштіс зорӱдыс. Ёсь вевта кузьмӱс керка кодь лои.

Зорӱд дорын сулаліс пашкыр пожӱм. Сы улӱ и дзевсисны пуктысысыяс, мед вывті не кӱтӱдчыны. Медбӱрын локтіс Семӱ дядьӱ. Сійӱ сибӱдчис Витялань да гораа шуис:

— Молодеч! Аски кутан он кыскасыны?

— Кута!— окотапырысь вочавидзис Витя.

Гӱп весьтын, кодӱс гудьртіс Витя, лӱбалісны ракаяс. Зэрмигкежлад найӱ дзевсьывлӱны жӱ кытчӱкӱ, а ӱні быттьӱ вунӱдчӱмаӱсь: пуксыласны гӱп дорас да бӱр невылӱ качӱдчыласны. Весиг гымыштӱмсыйс эз повзыны.

Друг ракаяс кутісны кравзыны лӱкысь. Ставӱн видзӱдлісны сӱтчаны. Горш лӱбачьяс мырддысисны сынӱдас ыджыд чериӱн, нетшкисны сійӱс.

— Сир, буракӱ,— шуис кодкӱ.

— Со эськӱ чериыд вӱлі, ачыд кӱ кыйин!— шыасис Витя дінӱ Семӱ дядьӱ.

— Мед!— вочавидзис Витя.

## НАДЯ ДА ЛӨЗУК

Надя — кукань видзысьлөн ныв.

Лөзук — еджыд кокъяса, лөз мышвыла кукань.

Надя мамыскөд частө вољывлө картаө, отсасьö идрасьны. Сийö радейтö куканьяссö, но медся ёна радейтö Лөзукöс. А Лөзук радейтö Надяöс, мелі синьясөн видзөдö нывка вылө, век судзөдчö кыткö нюлыштны.

• Тайö сөстөм йитöдыс чужи со кызд. Öтчыд куканьясöс лэччөдісны ю дорö. Лөзук сэк зэв на ичöt вöлі, но тшötш вötчис.

Енэжын дзирдаліс шонді, веськыда пöжис. Куканьяс йирсьыштасны да пыраласны ваö ыркөдчыштны, сэсся бара йирсьыштасны да бара ваö.

Пажун гөгөр Надялөн мамыс кайис гортас öттор-мөдтор вöчны: рыт-асывсö öд сийö оз эшты, а Надялы тшöктіс слыштны куканьяс дорас. Мыйыс оз вермы лоны накөд?! Локтас, шуам, кутшөмкө кукань бужөд дінö, а бужöдыс кыр-дас, и усьö куканьяс.

Надя пуксис бужөдсянь неылö, кутіс öктыны гөгөрсьыс дзоридзьяс да кыны юркытш.

А мөдлапөвса вөр сайсянь лыбөдчис нин кык вевся кымөр. Надя сийöс казяліс, кор медводдза зэр тусьяс инмисны пельпомас да мышкас. Зэрмис зэв ёна, сувтсөн пондіс шливгыны. Куканьяс пырисны коз пуяс улö. Öти коз пу улö котöртіс и Надя, жмитчис ствол бердас. Сэтысь сийöс зэрыс эз босьт. А куканьяс вылын здукөн эз коль кос места: көтасисны да пöшти öткодь руд рёмаөсь лоисны ылісянныс. Йöжгыльтчөмаөсь ставныс, торйөн нин Лөзук. Сийö кадысь кадö тірмунлö — сэтшөма кымö. Надялы зэв жаль лои Лөзукус. Нывка пөрччис вывсьыс жакетсö, локтіс кукань дорö да плавкнитіс сылы мыш вылас. Лөзук дугдіс кынмыны. А ре-гыд и зэрыс кобис.

Сэсянь Надя да Лөзук радейтöны öта-мөднысö.

Пырас Надя кукань видзан картаө да шуас:

— Лөзук!

А Лөзук небыда вочавидзас:

— Му-у!

Мамыс Надялы висьталіс, мый коркө Лөзукусь зэв бур  
мөс лоас. Та вөсна Надя нөшта нин төждысьө Лөзук вөсна.

## МИЯН СИКТЫН

Миян сиктын этша вөв,  
Кыскасьыштны сөмын.  
Но пыр унджык яй да йөв  
Сетө сиктным өні.

Дасысь унджык, вильсьыс-виль,  
Трактор өні миян.

Өти здукөн эштө, збыль,  
Сьөкыд уджыс сійөн.

Весиг муяс вылысь из  
Трактор өні өктө,  
И ме лоа тракторист,  
Оз ков меным тшөктөм.

## ВИДЗА КОЛЯН, ШОНЫД ГОЖӨМ

Видза колян, шоныд гожөм!  
Видза олан, кыпыд ар!  
Пемыдвижөсь коз да пожөм,  
Коръя пуыс биысь яр.

Енэж паськөдчөма лөза,  
Мустөм зэрсө оз на вай.

Муяс вылын бара йөза:  
Тырыс локтө урожай.

Радлө гөрысь, радлө быдөн:  
Збыльмис ыджыд-ыджыд мог.  
Гортас өні пемыд рытөдз  
Некод ыб вылысь оз лок.

## ВЕЛОДЧЫ

Ставыс быттьө төдса:  
Велөдысь и школа.  
Пырин тэ виль классө,  
Төкөтыштө полан.  
Тайө абу лектор,  
Ставокд овлө тайө:  
Ыджыд классыд нөшта  
Ыджыд төждлун вайө.

Сьөлөмсяньыд босьтчан,  
Сьөкылдунсө венан,  
Артыштөма содас  
Вежөрлуныд тэнад.  
Төдөмлунтөг өні  
Оз позь некыз овны.  
Велөдчы, мед бөрас  
Эз ков сэсса повны.

## БЫТТЬО КАРЫН

Миян сиктын унджык керкаыс выль. Эжва дорсянь кō  
рытнас видзōдны, сиктным дзик кар кодь. Гōгōр югыд би.

Водзтi вōчлōмаōсь кōзōдъяс. Ии да лым вōлōм сэтчō  
пыртлōны. Гожōмнас сэсся видзōны сэнi одийō тшыкысь сёян.

Они миян эм жō кōзōд. Сōмын аслыспōлōс. Сылы оз ков  
лым ни йи, ачыс кынтō. Ток отсōгōн. Шусьō — холодильник.  
Ми сэтчō пуктывлам яй, вый и чери.

А ковмас кō пеласьны, огō нин пыртлōй кузь вор да се-  
ра пōв. Ставсō машинаōн пелалам. Абу и ыджыд сийō, а  
дзонь чукōр вит минутōн пелалас.

И телевизор миян эм. Москва и Сыктывкар видзōдам.  
Миян сиктын зэв уналōн телевизорыс.

Олам ми сиктын, а быттьō кōнкō карын.

## НЫВКАЛОН ВИСЬТ

Менам мам быдтор кужō вōчны. Тōрыт на сэтшōм мича  
партук меным вурис, а талун зэв чōскыд шаньга пōжалiс.

Водз асывнас мам оз овлы гортын. Сийō идрасьō карта-  
ын, песни куканьясōс видзō. Турун сёйны найōс велōдō.

Школа бōрын ме тшōтш ветывла картаас. Отсая мам-  
лы. Ёнджыкасō ме юан дозъяссō весала турун ёгьясысь. Сэс-  
ся кималасōн видлала да тōдмала, кутшōм кукань лōо сюра.

Мам — бур уджалысь. Сийōс век ошкōны.

Мамōс кыкысь нин корлисны карō. Бōрьяысяс сийō  
тшōтш сёрнитōма зэв уна йōз водзын.

Ме эг чайтлы, мый кукань видзōмысь вермасны сетны  
орден. Абу од, мися, тайō кутшōмкō подвиг. А мамлы сетō-  
маōсь Ленин орден!

И газетын мам йылысь гижлисны. Уджывса геройōн вō-  
ли гижōмаōсь. Ачым лыддьылi.

Но и та бōрын мам оз пуксысь вылō. Удж вылас зиль,  
а йōзыскōд шань. Сōмын менō видывлō мисьтōма гижōмысь.

Таысь ме ог лōгасьлы сы вылō. Менō сийō бур вылō ве-  
лōдō. Ме помтōг радейта мамōс!

# ОГ КОЛЬЧЧЫ ВОКЫСЬ

Воис армияысь менам вок. Эз на дзикӧдз. Сійӧс лэдзӧ-маӧсь гортӧ дас лун кежлӧ, отпускӧ.

Вокӧй ракетчик. Ракетанас медся ӧдйӧ да медся бура лыйӧмысь и лэдзӧмаӧсь. Тшӧтш и кымынкӧ ёртӧс сылысь.

Вок петкӧдліс меным карточка. Сэні сійӧ сулалӧ паськӧ-дӧм знамя дорын. Тайӧ ракетной полкыслӧн знамяыс. Бура служитӧмсьыс тадзсӧ вокӧс снимайтӧмаӧсь.

— Ми видзам енэж,— висьталіс вок.

Вок нӧшта висьталіс, мый веськавны ракетчикӧ абу кокни. Школаад кӧ лёка велӧдчин, оз на и босьтны. Ракетчикыдлы пӧ колӧ кужны ӧдйӧ да стӧча артасьны. А то пӧ лыян, да он и инмы.

А кутшӧм ён вокӧй! Ме ӧшӧдча сылы сояс, а сійӧ менӧ кокниа и лыбӧдӧ. И мӧд сойнас тадзи жӧ.

Со кутшӧм менам салдат-вокӧй!

Ме нинӧмӧн ог кӧсйы кольччыны сыысь.

## ПОСНИЯСЛЫ СЫЛАНКЫВЪЯС

### ТАЛУН ПРАЗДНИК

Шонді, пемыдсӧ тэ пасьнит,

Вӧтлы ме моз ассьыд ун.

Талун праздник, ыджыд праздник —

Сӧвет мулӧн чужан лун.

Талун татӧні и сэтӧн

Гора шыалӧ Москва.

Флагӧн ывлаӧ ме пета,

Тожӧ горӧда: «Ура!»

### ПЕРВОМАЙ

Кӧдзыд кӧть тӧлыс,

Повзис на тай.

Бара со тулыс,

Первомай.

Первомай! Первомай!

Ноко, йӧктыштамӧ вай.

Вылӧджык, шонді,

Енэжас кай.

Талун ми пасьям

Первомай.



Первомай! Первомай!  
Ноко, йоктыштамō вай.  
Гажодчас быдōн  
Ассьыс мед пай.

Отчyd од онас  
Первомай.  
Первомай! Первомай!  
Уна радлун бара вай.

### МАМӨ, ЭН ВИД

Медым зэв няйтōсь  
Чужом и ки,  
Талун тэ, мамө,  
Менө эн вид.  
Талун ми помим  
Ичотик шор.  
Абу од тайө  
Виданатор.

Мынас на няйтыд —  
Ыджыд тай шог.  
Мысся да сёя  
Кык тасьтi рок.  
Аски тэ меным  
Унджык на пу,  
Быдмыны колө,  
Помны мед ю.

### ИВАН ДА МИ

Локтiс отпускō Иван,  
Пельпомас погонъяс.  
Стройон борсьыс ветлөдлам  
Дженъыд гача зонъяс.  
Кодi сэн, кодi сэн  
Торкө строй?  
Оти-кык, оти-кык,  
Стой!  
Сувтiс, видзөдө салдат  
Эжва дорса нōрыс.  
Кольом во на сийө тат  
Трактор вылын гōрис.

Водзө — марш, водзө — марш,  
Тэрыб строй!  
Оти-кык, оти-кык,  
Стой!  
Ылын-ылын пө эм яг,  
Сэтон пө ракета.  
Уськөдчылас пө мед враг, —  
Сэтшөм водзөс сетам!  
Сылыгтыр, сылыгтыр  
Восьлав, строй!  
Оти-кык, оти-кык,  
Стой!

### МЕНАМ СЕРКО

Менам Серко ыджыд пон,  
Гашкө, койнысь на ён.  
Лэчыд сылөн гыж и пинь,  
Синмас öйө югыд кинь.  
Ачым быдтi сийөс ме,  
Пөжөм йөлөн вердi век.

Онi сөйө нянь и рок,  
Ветлө мекөд, быттө вок.  
Сөмын сёрнитны оз куж:  
Эг од мортон пө ме чуж.  
Но и мед, мый абу морт,  
Меным сийө зэв бур ёрт.

## МЫЙ, КӨТЬ И ВӨТАСИ

Лэбны ракетаён  
Уси мен шуд.  
Югниті сэтчө,  
Көн енэжыс руд.  
Та өдйө лэбигад  
Некод оз су.  
Видзөдлі сөмын,  
Кыз ичөтмө му.  
Мый, көть и вөтаси,  
Мый, көть и вөтаси,—  
Быдма да лэбзыла збыль.  
Лэба да сылигтыр  
Мөвпала ме:  
«Мыйлакө нинөм оз  
Паныдась век?  
Кытөн нө төлысыс,

Эз мөй ло яр?»  
Видзөда: водзвылын  
Виж рөма шар.  
Мый, көть и вөтаси,  
Мый, көть и вөтаси,—  
Быдма да лэбзыла збыль.  
Төлысь и вөлөма,  
Матын нин со.  
Пукси да юөрти:  
«Нинөм эз ло.  
Дзоньвидза тані ме,  
Радлунөн тыр.  
Кутшөми төлысыс,  
Висьтала пыр».  
Мый, көть и вөтаси,  
Мый, көть и вөтаси,—  
Быдма да лэбзыла збыль.

## ЫДЖЫД НИИ

Ичөт Валялөн ворсігас чачаыс уси петшөр пиө. Валя көсйыліс судзөдны чачасө, но петшөраліс кисө да бөрддзис.

А Юрик сэки буретш вөлі пукалө кильчө вылас да вөчө нөввууж. Сійө кыліс бөрдөмсө да локтіс Валя дорө.

— Чачаөй петшөр пиас уси,— вомсө вежыньтөмөн шуис Валя.

— И та вөсна бөрдан?— юалис Юрик.

— Дерт, ог вермы судзөднысө да.

— Ой, лоөма тай судзөдантор! Öти здукөн судзөда.

— Верман?— юалис Валя.

— Ог вермы? Көть куш киөн судзөдчыла да босьта.

И Юрик нарошнө пуджис соссө, нюжөдчис, кималасөн корсис петшөр пиысь чачасө да сетіс Валялы:

— На, босьт!

Валя нимкодъысла эз төд, мый вöчны.

— Оз зöлит?— юалис сийö.

— Зöлиттөг олас! Ещö кутшöма на зöлитö!— шуис Юрик да петкөдлис алöйгөрд чутъясөн серөссьöм сойсö.

— А мыйла нö он бөрд?— бара юалис Валя.

— Бөрдны кута?! Ме öд ыджыд нин!— вочавидзис Юрик да мунис вöчны ньöввужсö.

## АРТАСЬÖМ

Миша локтис исласянинысь да кайис паччөрö. Сэни сийö шоналис да вугыртис. Но кодкө друг кыскыштитис пельпомöдыс. Миша восьтитис синъяссö. Тетрадя да ручкаа пукалис сы динын Зина чойыс.

— Миша,— шуис сийö.— Отсышт этайö задачасö вöчны.

— Лыдды условиесö,— дышпырысь вочавидзис Миша.

Зина лыддис. Задачаыс вöли со кутшöм: «Парник вылын куйлисны дас рама. Первой босьтитисны витös, сэся кыкös. Кымын рама коли парник вылас?»

— Тайöс он куж?— серам сорөн юалис Миша.

— Ог,— муртса кывмөн шуыштитис Зина.

— Тайö жö зэв кокни,— Миша лыбөдчис гыррдза вылас.— Вот, шуам, мамыд вайис пызан выlö дас шаньга. Тэ сөйин витös, а ме кыкös. Уна-ö коли?

— Ме вит шаньгатö эг на сөйлы! Эн пөръясь!— дözмис Зина.

— Бытьöкө сөйин,— шуис Миша.

— Бытьöкө,— нерыштитис Зина.— Ачыд век ставсö сөян-а, меным он и сетлы. Сюсь öд!

— Кор сөйли?!— соссис Миша.

— Тöрыт на,— эз сетчы Зина.— Став рыськасö аслыд босьтин. Мамыд юрсидыд таысь ещö някыртис. Паччөрö сэс-ся кайин.

— Кынма вöли да, дерт,— дорйысис Миша.

— Кынман тай! Никöстин-а,— эз лэдзчысь Зина.

— А тадзтö кö, мун татысь!— скöрмис Миша.— Ачыд вöч.



— Вöча на öд, ог али мый?!— шуйс Зина да лэччис паччöрысь.

Недыр мысти Миша кыпöдчыліс да видзöдліс паччöрсянь. Зина шуаліс мыйкö вомгорулас да зіля артасис чуньяснас.

## НЯВДА

Град вылын быдмис морков. Корьясыс вöліны весьт судтаöсь на, сöмын на заводитісны пушкыртчыны. А Толиклы эз нин терпитсы видлыны морковсö. Öд сійö мый дыра нин эз сёйлы. Но мамыс шуö, мый арнас пö сöмын позьны кутас. А арöдзыд ещö мый ылнаын на! Толик сулаліс град дорын да жугыльмис и жугыльмис.

«А гашкö, гырысьöсь нин морковьясыс да?»

Толик видзöдліс юкмöслань. Мамыс пожьяліс сэнні тазыйн сылысь дөрöм-гачсö. Сійö öні мышкөн сулалö да, дерт, оз казаяв.

Толик лажыньтчис град пельöслань, шамыртіс ки тырыс морков кор да нетшыштигмозыс топöдіс киняулас. Сэссия сувтіс да котöртіс пес чипас сайö, видзöдліс морков вылас. Кага чаль чуньысь на ичötджык куим гөрдоват вуж чурвидзисны заяс помас. Толик курчыштіс öтиöс. Вомас лои курыд-курыд, ковмис бөр сьöлыштны.

А мамыс сэки буретш локтіс юкмöс дорысь. Сійö кыліс сьöлыштöмсö да видзöдліс пес чипас сайö, аддзис сэтысь Толикöс.

— Мый нин сэн вöчан?— юаліс мамыс.

— Сёя,— шусис Толиклөн.

— Сёян? Мый?

— Нявда!— збоякодь вочавидзис Толик да весиг мыччыліс мышку сайсьыс морков корьяссö. Мамыс, дерт, казаяліс, мый Толик пөрьясьö. Та вöсна веськодьпырысь шуйс:

— Сёй, сёй, мед öдйöджык кулан!

— Мыйла?— повзис Толик.

— Нявдасö оз позь сёйны.

— Тайё өд абу нявда...— нора гөлөсөн шыасис Толик.  
— А мый нө?— юалис мамыс.  
Воча кыв пыдди Толик гораа бөррдзис.

## ПЕТЯ

Челядь мунисны вөрө вотчыны. Петя вөлі медводзын да аддзис ыджыд чөдлач куст.

— Чур! Тайё менам чукөрыс!— горөдіс сійө да паськөдіс кияссө, мед некод оз матыстчы.

— А ми?— юалисны челядь.

— Асьныд корсьөй!— вочавидзис Петя, сэсся пуктіс муас наберушкасө да кутіс сувйыны-вотны чөдлачсө.

Челядь чөв ланьтісны да видзөдісны өта-мөд вылас. Найө виччысисны, оз-ө Петя веж асьыс кывсө, но Петя эз и думайт чукөстны найөс.

Сэк челядь мунисны водзө да ичөтик шор дорысь аддзисны өмидз кустьяс. Кисьмөм кельыдгөрд өмидзис сөмын сяр-видзис. Челядь өдийө кытшалісны кустьяссө, сөйыштисны мыйтакө чөскыд вотөссө, а сэсся заводитісны өктыны дозьясө. Недыр мысти сэтчө локтіс и Петя. Уна өмидз аддзөм бөрын сылөн паськавлісны синьясыс, но яндзимысла эз лысьт матыстчыны. Петя сулаліс юрсө лэдзөмөн, ньылаліс дульсө. Жальыс петіс челядьлөн.

— Лок, вотчы тшөтш, миянлы тырмас на!— корисны найө Петяөс.

Та бөрын сэсся Петя некор нин тадзи эз вөчлы.

## МАШИНА

Славик сулаліс пидзөсөдзыс лятиын да тэрыба лэпталіс кокьяссө. Вомнас сійө шуаліс: «Жур-р! Жу-у-р-р!». Гачыс, дөрөмыс, чужөмыс — гөгөр вөлі няйт.

Тадзи и суис Славикөс мамыс.

— Мый тэ сэн вöчан, ноко вай висътав?— скöрысь горöдiс сийö, но эз пыр гуранö, полис няйтöсьтны кöмсö.

Славик дугдiс вөрöдны кокъяснас.

— Мый тэ сэн вöчан?— бара юалис мамыс.

— Буксуйта,— вочавидзис Славик.

— Буксуйтан?— шай-паймунi мамыс.— Тэ öд абу машина!

— Машина,— эскана шуис Славик.— Ме, мамö, машина, кутшöмön тай Семö дядьöйд ветлö.

Мамыс сöмын швачкис бокъясас кияснас, нинöм сэсся эз куж шуны.

## АЧЫМ ТÖДА

Зонпосни лэччисны ва дорö вуграсьны. Ю дiнö вотöдз найö кежалiсны раскö да перйисны сэтысь шатинъяс. А Шуриклы дыш лои пыравнысö да босьтiс туй бокысь сiсьмыны нин заводитöм бедь.

— Ой, кутшöм шатины!— кутiсны серавны сы вылын ёртъясыс.

— Ачым тöда, кутшöм!— вочавидзис Шурик да заводитiс кöртавны бедь помас вугыр кöвсö.

— А кöвйыс?! Кöвйыс мый кызта!— горöдiсны челядь.— Тэнад кöвйысь чериыс километр сайö пышъяс!

— Ачым тöда!— вочавидзис Шурик.

— А вугырыс! Вугырсö видзöдлöй! Тайöн весиг китöс позяс лэптыны.

— Ачым тöда!— вочавидзис Шурик.

— А нидзувъясыд кулöмаöсь да, öти ловъя нидзув абу!— шуис кодкö челядь пиысь.— Кос турун сi кодьöсь! Кутшöм чери нö татшöм сам дорад локтас?

— Ачым тöда!— вочавидзис Шурик.

Недыр мысти заводитiсны вуграсьны. Челядь пуксисны колясяс весьтö да первой чöвтöмас жö морт-мöдлысь сейис. А Шурик торйöдчис наысь. Сийö вуджис ю мöдарас.

— Сэтысь нö, ляпкыдiнсьыс, кутшöм чери тэнсьыд босьтас?— шуисны сылы ёртъясыс.

— Ачым тōда!— ропкыштіс Шурик.

Лунтыр вуграсисны челядь, кыйисны ёкышъясōс, кельчиясōс, ляпапаянōс, а кодсюрōлы весиг и сынпиян шедісны. А Шуриклысь, кызди муніс мōдар берегас, сідзи некод эз и дэбнитлы. Вот сылы и «ачым тōда»!

## РӨМПӨШТАН

Пызан вылын сулаліс рөмпөштан. Вася йөткыштіс сійөс гыррдзанас. Рөмпөштан уси джоджō да жугалі.

— Ой!— горōдіс Лиза, Васялōн чойыс.

— Висьталан кō!— ырыштчыліс сы вылō Вася.— Он өд висьтав?

— Ог,— кōсйысис Лиза.

Вася өдйō чукөртіс рөмпөштан торъяссō да шыбитіс ывлаō.

Недыр мысти воис мамыс. Вася эз пов ёнасō, надейтчис Лиза вылō. А чойыс кутіс ассьыс кывсō. Сōмын эз дзик сідзи, кызди чайтіс Вася. Пуксисны ужнайтны, да Лиза зэв збыльысь шуис:

— Мамō, рөмпөштантō Васяйд эз жугōд!

Мамыс клён пуктіс паньсō, видзōдліс Вася вылō. Васялōн чуқыртчōм чужōмыс висьталіс сылы ставсō.

## СКВОРЕЧ ПОЗ

Кыз пу вылын чōла пукалōны кык сквореч. Найō корсьōны поз. Олег сулалō кильчō дорас да жалитөмпырысь видзōдō на вылō. Тōрыт эськō сійō заводитліс вōчны позсō, но нинōм эз артмы: то пōлōсōн пōвйыс пилитяс, то потō кыткō тувьялігас, то кōрт тувйыс мегыр моз кусыньтчас. Медбōрын и кисō дойдіс. Эновтчыны лои. Мый вōчан кужтōгыд?

Сиктын уна пуын позйыд эм. Но өд и скворечьясыс эз этшаōн воны. Тайō кыкыс со позтōмōсь кольбмаōсь.

Пукалісны на мыйкō дыра скворечьяс дай лэбисны. Олег

лолыштіс зэв ыджыда да пырис гортас. И сэк сылы тōд вылас уси важ туис. Пыдōсыс туисыслōн пысьтіс, и мамыс дугдіс сійōн вōдитчыны, шыбитіс мудōд вылас вевтнас и быдсōн. Сыысь бурджыктор поз вылад ōдвакō сюрас!

Олег зэв ōдйō кайліс мудōд вылас да лэччōдіс туиссō. Сэссия босьтіс тасьті-пань видзанысь батыслысь ёсь пуртсō да пыськōдіс сійōн туис бокō ичōтик гōгрōс розь. Сквореч поз лои дась, сōмын ōшōд! Олег лэччыліс посводз улас, корсис сэтысь сутуга тор. Ōти помсō сылысь кōрталіс туис вевт вугъяс, а мōдсō босьтіс киас да котōртіс кыздзлань. Кавшасис-кайис пōшти дзик йылōдзис.

— Мый нō вōчан?— горōдіс кодкō мусянь.

Олег видзōдліс муō. Кыз пу дорын сулаліс Зосим.

— Сквореч поз ōшōда!

— Туисысь?— гораа серōктіс Зосим.

— Мый нō кōть?— вочавидзис Олег.

— Чайтан, скворечьясыд йōйōсь? Аддзылан, уна-ō позьяласны!— чиктыліс Зосим.

Олег эз шыась. Сійō зэлыда гартліс сутугасō ōти кыз вож гōгōр, а кольōм помсō бара кōрталіс туис вевт вугъяс.

Рōмдытōдзис виччысис Олег скворечьясōс, но найō эз и петкōдчывны. Сэтшōм заведнō лои сылы, кōть бōрддзас. Сідзи и водіс узыны.

Но асывнас, унзільпырыс на, Олег кыліс тōдса шыяс. Ōдйō чеччис крōвать вывсьыс да локтіс ōшинь дорō. Туис дорын пукаліс сквореч да сьыліс: «Шить-пить-тюр-р!» А поз розьсянь гонькъяліс мōд сквореч.

## КОЛЯ ШОГМŌ КОСМОНАВТŌ

Ōтлаасьōмаѳь кум зонка. Быдтор йылысь нин сѳрнитōмаѳь да ōні чōв олōны. Коля да Феликс ōтыджаѳь кымын, а Петя неуна ыджыдджык. Феликс ōчка.

ПЕТЯ (очсыштō). Кузнеча дорад тай чукля кōртыс эм...

ФЕЛИКС. Но?

ПЕТЯ. Ме сійōс юр весьтōдз нин верма лэптивны.



КОЛЯ. Век отиторнас ошйысьö. Ми од коркö вермыны жö кутам. Да од, Феликс?

ФЕЛИКС. Ы-ы.

ПЕТЯ. А ме космонавтöн лоа!

КОЛЯ. Ми од лоам жö.

ПЕТЯ. Тэнö эськö, Кольö, и оз босьтны.

КОЛЯ. Но?!

ПЕТЯ. Быд понйысь на полан да.

КОЛЯ. Кутшöмысь?

ПЕТЯ. А Максö Лыскоысь и полан.

КОЛЯ. А сыысь, Петь, тэ и ачюд полан.

ПЕТЯ. Ме? Тöрыт на кильчö помöдыс котöрти.

КОЛЯ. Ме од, кор абу сйö, которта жö.

ПЕТЯ. А тэнö бөр бергöдасны, кöть и вöзйысьлан космонавтад. Он пö шогмы — шуасны и ставыс.

КОЛЯ. Коді шуас?

ПЕТЯ. Комиссияыс.

КОЛЯ. Аслыд вот шуасны.

ПЕТЯ. Меным дай! Ме кöть öнi жö... Вай тэ, Феликс, комиссия быттьö лоан. Мый нö, öчкиа и быдöн?! (Колялы.)  
Аддзылан, уна-ö шогман!

КОЛЯ. Ог пов, ог.

ПЕТЯ. Повзян на. (Феликслы.) Тшöкты мыйкö вöчны.  
Али кывзы первой.

ФЕЛИКС. Мый кывза?

ПЕТЯ. Миянöс. Кылан он сьölöм тiпкöмнымöс.

ФЕЛИКС. Но. Тэсянь заводита?

ПЕТЯ. Дерт, мясянь. (Лэптö дөрöмсö.)

ФЕЛИКС (топöдчö пельнас Петя морöс бердö). Кыла.  
Тiпкö сöмын!

ПЕТЯ (вашмунлö). А öнi Кольöыслысь кывзышт.

КОЛЯ (полöмпырысь лэптö дөрöмсö). Менам од кылас жö.

ФЕЛИКС (кывзö). Тiпкö жö. Сöмын öдйöджык быттьö.

ПЕТЯ. Но вот, повзöмыд нин со!

КОЛЯ (ышловзö шoга). А öнi, Феликс?

ФЕЛИКС (кывзö). Оз нин сэтшöм öдйö.

ПЕТЯ. Первойсö тай öдйö-а.

КОЛЯ. Эг сэки лолав да, дерт.

ПЕТЯ. Но и мед. Он жö нин шогмы-а.

КОЛЯ. Ог, Феликс?

ФЕЛИКС. Час ещö кывзышта. (*Кывзö.*) Шогман кö-а.

ПЕТЯ (*Феликслы*). «Кö-а». Тэ стöча висьтав. Он пö шогмы — и ставыс.

ФЕЛИКС. Шогмö.

ПЕТЯ (*дöзмö*). А тадзтö кö и... водзö либö! Тшöкты мыйкö!

ФЕЛИКС. Тшöкта на öд. Ноко, юр вежөрныд бергöдчö оз? Кино вылад тай, аддзылнныд, кызди космонавтъястö...

ПЕТЯ. Көн нö ми тани кутам бергавны?

ФЕЛИКС (*мövпыштö*). Позьö öд и места выланыд.

ПЕТЯ. Қымынысь?

ФЕЛИКС. Витысь. Витсьыд этша быдөн вермас. Дасысь!

ПЕТЯ (*кöсйылö, но дугдö*). Мед сийö первой. (*Довкнитö юрнас Колялань.*) Ме видзöдла.

КОЛЯ. Чайтан, ог вермы? Со! (*Бергöдчö дасысь да джём сувтö.*)

ФЕЛИКС (*Петялы*). Тэ сэсса. Оз быттьö кыв.

ПЕТЯ. Эн тэрмöдлы. Көть сёсысь бергöдча. (*Бергöдчö дасысь кымын жö, но сувтö да шатовмунö.*)

КОЛЯ. А-а, ачyd и шатовмунін?!

ПЕТЯ. Ме?

КОЛЯ. Мый нö! Аддзылім öд. Да öд, Феликс!

ПЕТЯ (*ырыштчö Феликс вылö*). Шуан кö эськö прöстасьыд!

ФЕЛИКС. Эн ыршась, эн. Ыджыдджык, да сэсса и...

ПЕТЯ. Аслам кокö коньяси да...

ФЕЛИКС. Висьтав кодлыкö.

ПЕТЯ. А либö эг и шатовмун. Вот!

ФЕЛИКС. Шатовмунін.

КОЛЯ. Йöйясөн мянös чайтö.

ПЕТЯ (*Колялы*). А тэ эськö вешйы. Абу тэ комиссия.

КОЛЯ. Эн ылöдчы дай.

ПЕТЯ. Ёна колö! (*Феликслы*). Водзö вай, водзö. (*Колялы.*) Видзöдлам на, кодным шогмам.

ФЕЛИКС. Мый и кöсйылі сэсса сетны? А-а... Космо-

навтъясыдлы колѳ зэв сюсь синмаѳн лоны, мед зэв ѳдйѳ быд-  
тор казавны. Ноко, видзѳдлѳй эстчань. Бергѳдчѳй. Мый,  
Петя, аддзылн?

ПЕТЯ. Мый аддзылі? (*Гыжйыштѳ пель сайсѳ.*) Но,  
жытник.

ФЕЛИКС. Сэсся?

ПЕТЯ. Сэсся... потшѳс. (*Кѳсйѳ кыйкнитлыны.*)

ФЕЛИКС. Э-э!

ПЕТЯ. Из ли мый ли.

КОЛЯ. Из тай, порсь-а.

ФЕЛИКС (*Колялы*). Правильнѳ.

КОЛЯ. Чипан на вѳлі ветлѳдлѳ дай. Потшѳс сайѳдыс.

ПЕТЯ. Пыр и содтыштіс! Ме ѳд верма жѳ тадзтѳ мыйкѳ  
шуны. Мися, катша вѳлі лэбѳ.

КОЛЯ. А чипаныс збыль вѳлі ветлѳдлѳ.

ФЕЛИКС. Збыль. Петѳма нин со йѳрсьыс.

ПЕТЯ. Кѳні? (*Бергѳдчѳ да видзѳдлѳ.*) Быд чипанѳс кѳ  
сэсся казавны и.

КОЛЯ. Ыджыдтѳ ѳд быдѳн аддзас. (*Бергѳдчѳ жѳ.*)

ПЕТЯ. А эн кѳ тэ суйсьы, ме, гашкѳ, мыйкѳ висьталі на.  
Вот! (*Феликслы.*) Водзѳ!

ФЕЛИКС (*мѳвпыштчылѳ*). Мыйла тѳлысь чарла кодь  
овлѳ?

КОЛЯ. Тайѳс нѳ код оз тѳд?!

ФЕЛИКС. Энлы, мед Петя висьталас.

ПЕТЯ. Тайѳс ми эгѳ на велѳдлѳй.

КОЛЯ. Эгѳ тай. Абу и гѳгѳрволѳмыд-а.

ПЕТЯ. Ачyd эськѳ тэ он жѳ тѳд.

КОЛЯ. Ог тѳд! Муыс шондіа-тѳлыся костас веськавлѳ,  
сйѳн и чарла кодь овлѳ тѳлысьыс, оз дзоньнас югзы да.

ФЕЛИКС. Правильнѳ.

ПЕТЯ (*Феликслы*). Тэ кодь комиссияыд!

ФЕЛИКС. Эн тай космонавтад шогмы-а.

ПЕТЯ. Эськѳ ляснита кѳ муланьыс!

КОЛЯ. Видлы! (*Сувтѳ Феликс дор.*)

ПЕТЯ. А ме ог и ворс тіянкѳд. (*Мунѳ.*)

Коля да Феликс шпыньмунѳны, сэсся серѳктѳны.

Занавес.

## ТЫРА ПЕСТЕР

Гашкӧ, ягысь, гашкӧ, нюрысь  
(Ачыс оз нин бура тӧд)  
Ыджыд пестер ошлы сюрис,  
Сэни тырыс вӧли чӧд.

Ма кодь юмов чӧдйыд сывнас,  
Тырмылас кӧ шондӧ гож...  
Восьтӧс вевтсӧ, видлӧс кывнас,  
Синсӧ весиг куньлӧс ош.

Ӧддзис сӧйны, сӧйис юрсӧ,  
Муртса пестерыс эз пот.  
Помся апалӧ да мурзӧ,  
Бытьтӧ кодкӧ мырддяс вот.

Дасьтӧ регыдӧн и «вотӧс»,  
Волӧс ошлы ыджыд лун!  
Сэсся тапиктӧс да водӧс,  
Вужля бокӧ личкис ун.

Садьмис — шондӧ качӧ вылӧ,  
Пӧсялӧма гӧна мыш.  
Юмов кӧрсӧ чӧдлысь кылӧ,  
Сӧмын аслыс вотны дыш.

Синмыс водзӧ сӧйӧс кыскӧ:  
Вуджис яг да собис нюр.  
Лунтыр шӧйтӧс, оз-ӧ кыськӧ  
Тыра пестер бара сюр.

Кӧрсис муысь, кӧрсис пуысь,  
Сӧдзи-й суйс гажтӧм вой.  
Но, а кынӧмыс оз юась,  
Нюкыртлас да — ой-ой-ой!

Верман ӧмӧй овны тадзи?  
Он ӧд дышыд вӧсна кув...  
...Ӧни Мишук бара ачыс  
Зӧля вотӧ чӧд и пув.

## ПУРТА ТРАКТОР

Сымда трактор сиктын öнi!  
Уджалöны, сьöкыд кöнi.  
Трактор гөрö, трактор ытшкö,  
Кöрым пыртö карта пытшкö.  
Трактор чöвтö, трактор куртö,  
А эм трактор — нырыс пурта.

Пурта трактор медся ён,  
Виддзö вöчас баддьöсь сён,  
Либö ыджыд изтö  
Йötкас, бытьö истöг.

Пурта трактор медся бур,  
Öтнас косьтас васöd нюр,  
Либö лэптас туйтö,  
Кытi вöли уй кöть.

Пурта трактор медся колан,  
Сийön сы дiнö и вола.  
Эськö пуксьывны кö сэтчö,  
Ог на некодлы и сетчы.  
Вöча луннас медся уна,  
Сэссия гуляйтны на муна.

## „НЫВ КÖ ВÖЛИ“

«Ныв кö вöли, джоджтö чышкис,  
Тасьтi-паньтö бура мыськис,  
Няйтöсь кöмнад пырны полiс,  
Сё майбырöй, горттö олiс.  
Эськö ошки сийöс таысь,—  
А мый тэысь, няйт сюръяысь?!»

Тадзи мамö менö видö,  
Ыстö овны менö гидö.



Но, а ме нӧ сыысь мыжа,  
Чышкыси кӧ, шуам, дыша?  
Сідз нин чышки, кызди кужи.  
Либӧ нылӧн мед и чужи.

«Ныв кӧ вӧлі, ватӧ пыртис,  
Кильчӧ помсьыд лымтӧ зыртис,  
Ичӧт пачтӧ водзвыв ломтис,  
Локтигкежлӧ ставсӧ шонтис.  
Эськӧ ошки сійӧс таысь,—  
А мый тэысь, лым сюръяысь?!»

Бара мамӧ менӧ видӧ,  
Сьӧкыд быдтыны пӧ питӧ,  
Но, а паськӧм — мый кӧть ньӧблан,  
Сӧмын ньӧбӧмсӧ и тӧдлан.  
Меным видӧмыд, дерт, чушӧ,  
Но ӧд мӧдысь он ӧд чуж ӧд!

Кильчӧ дорӧ жугыль петі.  
Винӧв чурка вӧлі сэтӧн.  
Некод поткӧдны эз вермы,  
Чуркаас на вӧлі черным.  
Босьті нӧш да мӧд чер босьті,  
Сэсся нӧшкалӧм тай восьті!..

Эг на мырсьыв татшӧм яра,  
Лолӧс личӧдла да — бара!  
Чуркатӧ ме вӧчи пескӧ.  
Мамӧ аддзӧ, да оз эскы.  
Оз тӧд весиг мый и шуны,  
Сэсся петіс жӧ тай нюмыс.

## БУСКО

Мамӧ вылӧ скӧрман он?!  
Оз лэдз быдтыны мен пон.  
Нинӧм, шуӧ, понсьыс  
Весиг донтӧм донсьыс.

Мамöлы нö, сылы мый,  
Кор оз нинöм кый ни вий?!  
А мен вöрад долыд,  
Ог кöть сэсь и волы.

Менö гажтöмыд оз босьт,  
Но и понтöгыд оз позь.  
Пемдöдчан кö рытнад,  
Лöсьыдджык жö кыкнад.

Оз кö мамö кывсö веж,  
Аслам кывйысь ог жö кеж.  
Понпи аски вая,  
Буско, мися, тайö.  
Вот!

## КÖДЗЫД ЛУН

Сэтшöм кöдзыд талун луныс,  
Школаö ме абу мунысь.  
Диван вывсянь, увлань юра,  
Сунис торйöн канькöд дура.  
Суниссö кань пышйöдис,  
Дурны меным дышöдис.

Бытьö кодкö лымсö куртö,  
Бвла вылын лымйыс дзуртö.  
Код нин, мися, кылö сэни?  
Вөлöм, чуксалöны менö.  
Мый кöть кöдзыд, абу ляб öд,  
Öти здук — и ме нин абу.

Лыйсьö кöдзыд, шковакылö,  
Но, а миян петö ньылöм.  
Коді суйö, коді дорйö —

Оз пыр шайба потөм ворйö.  
Мудзöмаöсь кияс нин,  
Öзталöны бияс нин.

Небесаын турдöм тöлысь.  
Ог нин ызгöй, сэтшöм чөлöсь.  
Локтам гортö, öдва ловным,  
Видöмысь на колö повны:  
Ворсöмыд пö тиян помтöм!  
...Дыр на мед эськö оз шондöд.

## ИСЛАСЬÖМ

Коді кайö, коді лэччö,  
Коді даддьöн, коді лызьöн —  
Исласьöны, гашкö, кызьöн.

Исласьöмыд абу сейöм,  
Сыысь некодыр он пöt.  
Весиг кадыс — лун-ö, вой-ö —  
Вунöма, да он нин тöd.

Тövзян горув, бытьö бордъя,  
Сотчö баныд, бытьö дон.  
Нимкодь — кодöскö кö ордыян,  
Веськодь — кынман али он.

Кыті кырйыс медся джуджыд,  
Бара сэтчö нуö кок.  
А мый вöчтöм гортса уджыд,  
Сыысь ньöти абу шог.

Сэки-й кылан: «Аттö! Ноко!  
Эм-ö-абу тэнад горт?»  
Öти здукөн усян шогö,  
Довган, бытьö мыжа морт.  
Коді усьö, коді чеччö,



## ВИЧЧЫСЬТӨМ ШОГ

Оліс сиктын өти пөчө,  
Томनावліс век кильчө өдзөс.  
Оз кө томнав, оз и инась,  
Көть мед ачыс керка дінас.  
Бытьё тадзи сөмын позьё.  
Но а ключё — гуся розьё!

И вот өтчид, мый көть шу-а,  
Кильчө помас шогыд суас.  
Сэк, кор ключё вөлөм дзебө,  
Маті катша вөлөм лэбө,  
Пөчө пыдди оз и пукты,  
Чышкө лым да оз на-й дугды.

Друг тай юр весьтас дзик сьлөн  
Чирзөм, китшсьөм лёкысь кылө.  
Видзөдө да, катша пара  
Шенасьёны сэні яра.  
Мырддысьёны югыд ключөн!  
Кучкан көть, да кысь нө судзан?!

— Аттө... Ноко... Энлы... Часлы —  
Чайтө, гашкө, уськөдасны.  
Зэв тай көсьян! Катша пара  
Лэбыштасны, сэсся бара  
Мырддысьёны важсьыс яра.

Корсис пөчө сөмын мудзё,  
Лэбөдісны сылысь ключё.  
Жугөдчөмөн гортас пырис,  
Видчан кывйыс весиг бырис.  
Аски асывнас, кор югдіс,  
Вала петіг тас нин пуктіс.

## ЙӨКТЫСЬ КӨЧ

Югьд тувсов рытö  
Вöчö мыйкö быдөн.  
Сöмын полысь кöчлы  
Нинöм лои вöчны.  
Қынöмыс оз сюмав,  
Унмыс оз на лок,  
Поз йылысь оз думайт,  
Ручысь абу шог.

Вежöd вылö петис,  
Тривкъялыштіс сэті.  
Нинöм вöчан шудысь  
Йөктыштавны кутіс.  
Но, а гудөктöгьд  
Йөктынытö сьökьд.  
Көть и кокьд лудö,  
Колö на и гудök.

Гажлы эз во пом на,  
Кутіс ворсны вомнас.  
Льöбйыс сöмын вөрö —  
Йөкты, мыйта төрö.  
Полöм кöчлөн сыліс, —  
Мый көть мед оз ло!  
Войбыд сэсса кыліс:  
— Бо-бо-бо!

## КӨИН

Төвся войö көин  
Собö толаті.  
Гöныс быттö пöим,  
Синмыс быттö би.

Ылысь сійö аддзö,  
Кылö гөгөрбок,  
Восьлалö кöть надзöн,  
Тэрыб сылөн кок.

Сиктö сійö локтö,  
Оз-ö лышт пöт.  
Тöвнад сыысь лөктö  
Сэсся он и тöд.

Потшöс сайö сувтö,  
Зэлöдчöма, ён.  
Кильчö помын увтö  
Полөмпырысь пон.


И ми ог на узьöй,  
Бара петам со.  
— Пыр, колökö, Тузьö,  
А то он öд ло!

## ВАСЬКА КАНЬ

*(Серамбана сьыланкыв)*

Медся зіль да медся шань  
Васька нима сера кань,—  
Сьылі улыс еджыд.  
Шонді водзын пöжны мыш  
Некор сылы абу дыш,  
Сы кодь зільыд гежöд.  
Ня-у!

Гөбöч улын кылö шыр,  
Пыралас, но оз ов дыр,—  
Зэв нин сэні пемыд.  
Некод сөйтöгыд оз ов,  
Чöскыд сөян оз и ков,—  
Нök да яй кö эм и.  
Ня-у!



Гортö узыны кө оз лок,  
Доймö бöрас пель и кок,—  
Тышкасьöма бара.  
Ок и муса шоныд пач,  
Ниртö сэтчö дөрöм-гач,  
Мыськö сэсся яра.  
Ня-у!

Малыштöмыд сылы бур,  
Юрнас небыдика — зур,  
Вомгорулас мойдö.  
Öдйö бурдö сылөн дой,  
Бöжыс сувтса — бара збой,  
Бара көнкö койтö.  
Ня-у!

## ВÖРСА ДЕД ДА МИША

Миша куйлис диван вылын да вугралис. Сийö сöмын на пырис ывлаысь да пöттöдзыс сёйис.

— Уроктö нö кор велöдан?— шыасис мамыс.

— Велöда на,— нурбыльтис Миша.

— Велöдан!— эскытöма шуис мамыс.— Век лоö кыз-мырдөн тшöктыны. Ачyd некор он пуксьы. Ещö Гагаринөн көсьян лоны. Гагариныд мый висьталис радио пырыд? Зэв пö ёна колö велöдчыны, быдторсö пö колö тöдны, мед ракетаад лэбзывны. Некрытчö тэ он во, ме видзöда да. Ййöн и колян!

— Мед, коля кө!

— Кысь нö мед?— эз лэдзчысь мамыс.— Асьтö жö öд серавны кутасны. Миянöс батыдкөд и. Ноко, вай чеччы. Тырмас сэн нюжвидзны. Нинöмөн на эн мудз. Кор нин школа-сьыд воин! Кодлы шуöны? Чеччан он! Али лэптöм виччысян? Аттö дивö!

Миша дышпырысь пуксис.

— Песным пырттöм. Петав песла,— тшöктис мамыс.— Сэсся пуксьы дай велöд уроктö.

- Ачылд петав!— эз кывзысь Миша.
- Ачым! Ставсө ме? А тэ нө он вермы?
- Дыш меным!— дузмуні Миша.
- А сөйнытө абу дыш?
- Мый көть и сөя? Ог өд сөсся тшыглы ов,— дорйысис

Миша.

— Он и ов!— вомалис мамыс. Сійө казяліс нин Мишалысь горшасьөмсө.— Став вуйсука роксө со сөйөмыд. Мый ме тэныд шулі? Қолышт, мися, чойыдлы. Шулі эг, а? Асьтө сөмын төдан. Дыш да горш!

— Вуні менам,— вочавидзис Миша, быттө збыльысь вунөдіс.

— А чужөмыс!— друг шай-паймуні мамыс.— Чужөмыс! А кийс! Эг видзөдлы, а мыссьытөг и сөйөма. Ме тэнө, дуркөс, кымынысь нин өлөдлі! Ноко, мыссян он? Сөысь тшөктөм виччысян? Скөрма кө өд, ог на дыр видзөд!

Мамыс локтіс Миша дінө, чабыртіс сійөс пельпомөдыс да вайөдіс мыссян доз дорө. Буретш сәки пырис орчча керкаса нывбаба.

— Дөзмы көть эн, сваття, сөсся ог вермы терпитны,— шуис сійө Миша мамлы.

— Мый нө? Мый лои?

— Бара нин Мишаыд миянлысь Шурикөс нөйтөма. Кодкөлун вөлі кильчө вывсянь тойыштөма-а. Вермө ичөттө!

— Нөйтін Шуриксө?— юалис Мишалысь мамыс. Миша чөв оліс. Мый сійө висьталас, кор збыльысь нөйтис.— Кильчө вывсянысь тойыштін и? А тадзтө кө, мун кытчө гажыд! Он тэ миянлы татшөмыд ков!— мамыс някыртіс пельөдыс, сөсся восьтіс өдзөссө да йөткыштіс посводзө.

Миша петіс ывлаө. Дерт, мамыс эз век кежлө вөтлы. Сійө радейтіс писө. Но өні быть коліс кызкө чырышты.

Өтнадлы улича шөрад гажтөм сулавнытө. Нинөм вөчигмоз Миша довгис вөрлань. Мөвпыштіс олышты вөрас, сөйышты ёль дорысь өмидз, а сөсся пемдандорыс локны гортас. Сэк кежлө мамыс бурасяс.

Миша пырис вөрө, кежис векныдык ордымөд ёльлань. Регыдөн и воис сэтчө. Но чөсмасьнысө сэн нинөмөн нин вөлі. Став өмидзсө вотөмаөсь, некөн өти тусь эз тыдав.

Нöшта шог лои Мишалы.

Неылын сулаліс пöрысь коз, ставнас ройöссöма. Öтар бокыс сьлөн коркö керыштлöмысь сирöссöма. Миша матыстчис коз дорö, гыж йывнас чуктöдіс сир тор, суйис вомас. Сирыс уль на вöлі, курыд, пиньö сибдан. Бөр ковмис сьöлыштны вомсьыс.

Дзикöдз Миша уси сьöлöмнас. Пуксис коз бокö, доровтіс юрсö, лэдзис льöбсö.

— Миша! Миша!— шыасис друг кодкö коз пу йывсянь.

Миша сэтшöма повзис! Вөрзыны оз вермы, кыис ни кокыс быттьö абу аслас.

— Миша! Миша! Қывтöм али мый?— бара кыліс, сöмын öні дзик дінас.

Мишаöс йирмөг босьтіс, воча пинь зятмуні. Жмитчис коз пу бердö, сэсся полігтыр калькöдыштіс син лапьяссö, видзöдліс. Сы водзын сулаліс пöрысь-пöрысь дед. Кузь тошкыс вожалöма.

Миша зэв öдйö бөр кунис синъяссö да бергöдчис коз пулань.

— Эн пов, Миша. Абу öд ме зверь,— небыда шуис дед.

— А-а, к-коді н-нö тэ?— повзьöмысла мöмьяліг, юаліс Миша.

— Ме Вöрса дед. Некодлы лөктö ог вöч. Бергöдчы мелань.

— А тэ нö менö мыйöн тöдан?— юаліс Миша да ньöжйöник бергöдчис дедлань.

— Ме ставсö тöда. Весиг тöда, мый тэнö талун гортсьыд вöтлісны. Ачюд, дерт, тэ мыжа. Но öні мый нин вöчан?! А, шуны кö веськыда, сьökыд тэныд лоö овнытö. Ок, сьökыд!

— Мыйла?

— Мöдарö тэ йöз сертиыс лöсьöдчан овны,— стöчмöдіс асьыс мöвпсö Вöрса дед.— Öні нин со кутшöм, а быдман да мый тэысь лоö? Он кö кöсйы вежсьыны, лок мекöд мунам. Бурджык лоö.

— Кытчö?

— Кытчökö. Öні и лэбöда. Кутчысь менам тошкö. Ой, энлы на! Мыссьы первой, а то лякöсьтан менсьым тошкöс.

Миша лэччыліс ёль дорö да мыссис.



— Со!— петкөдліс сөстөм кияссө.

— Кутчысь!— шуис Вөрса дед.— Чорыда кутчысь!

Миша кутчысис кыкнан кинас дедлы тош помъясас и качис сы бөрся енэжө.

Небыда лайкъяліг, лэбөны дед да Миша. На улын помтөм-дортөм парма. Посниось, истөг тув кузяось сәні пуясыс, көв кодь вөснийсь ёльясыс. Сэтшөма ставыс дзольдөма, сэтшөм выліті лэбө Вөрса дед.

Полөмыс Мишалөн вочасөн быри, сьөлөмыс заводитіс тіпкыны векеся өднас.

— Кытчө тэ менө, дедө, лэбөдан?— юалис Миша.— Оні өд позьө нин висътавны.

— Ме тәнө көсья вайөдлыны сэтшөм муясө, кодъясөс тэ некутшөм карта вылысь он аддзы,— вочавидзис дед.— Медводз ми сувтлам Йөйладорө.

— Ой, кутшөм мисьтөм нимыс!— шуис Миша.— А кодъяс нө сәні олоны?

— Ним сертиыс нин позьө гөгөрвоны. Сәні олоны йөйяс.

— Йөйяс?— эз эскы Миша.

— Да.

— Найө нө мортъяс жө?

— Да. Сөмын йөйөсь. Ыджыдөсь нин, а йөйөсь.

Лэбыштисны на мыйтакө, и Вөрса дед кутіс лэччыны. Пуксисны неыджыд кушинө. Турунсө сэтысь ставсө таялө-маөсь, но некөн некод эз тыдав.

— Көнөсь нө йөйясыс?— юалис Миша.

— Вөрас тай со вензьөны,— шуис дед.— Олышт на дінын. Ме регыд бөр локта. Водзө лэбөда тәнө.

Дед кытчөкө воши. Миша пырис вөрө, кытөн кылісны йөйяс. Найө эз и видзөдлыны Миша вылө, кор сійө матыстчис. Тыдалө, чайтісны ас кодьныс жө йөйөн.

Вензисны йөйяс зэв сьөлөмсяньыс, шенасисны кияснаныс. Мукөдыслөн гөлөсыс чирөма нин вензьөмысла, вомсьыс быг петө.

— Та мында колө пуны!— горзісны өтияс.

— Оз, эта мында колө пуны!— горзісны мөдъяс.

— Оз, та мында!

— Оз, эта мында!

Мишалы дышөдіс кывзыны тайё помтөм венсө да юалис:

— Мый нө вензянныд?

— Чери кыйны ми талун ветлім, со мыйта чери шеди миянлы,— висьталіс өти йөй.— Джынсө ми тарыт көсьям пуны, а мөд джынсө аски. Джынйыс өд та мында лоө? Да өд?

— Оз, эта мында!— вомалисны сійөс вензьысь йөйяс.— Эта мында өд?

— Дас чери тиян ставыс. Сідзкө, вит лоө джынйыс,— вочавидзис Миша.

— Мыйөн төдан?— юалисны йөйяс да кытшалісны Мишаөс.

— Юклөй дассө кык вылас, уна-ө лоө.

Мишалы лөсьыд вөлі тадзтө шуны. Сійө велөдіс нин татшөм артасьөмсө школаас да төдіс.

— Ми ог кужөй дастө кык вылад юкны,— висьталісны йөйяс.

— Эн өмөй велөдчылөй?

— Кутам велөдчыны! Ёна тай колө!— вочавидзисны йөйяс.

— Тадзтө өд йөйөн и колянныд,— шуис Миша.

— Мед, колям кө!— вочавидзисны йөйяс.

Мишалы зэв лөсьыдтөм лои таысь. Бытьё кывзөмаөсь сылысь мамыскөд өнтая сёрнисө да өні аслыс сідз жө шуалөны.

— Ыджыдөсь нин, а дассө онө вермөй кык пельө юкны. Абу өмөй яндзим?— көсийс Миша янөдны йөйясөс.

— А мый миянлы, йөйясыдлы!— вочавидзисны йөйяс да заводитісны пестыны бипур, мед пуны черисө.

Эз кө эськө Миша отсав, гашкө, өнөдз на вензисны, сідзи эз и вермыны төдмавны, уна-ө джынйыс лоө дасыслөн.

Миша шеныштис кинас, вешйис бокө. Недыр мысти, кызди и көсийсыліс, воис дед.

— Но, аддзылін йөйяссө?— юалис сійө.

— Аддзылі,— вочавидзис Миша.

— Сідзкө, лэбам водзө. Кутчысь!

Качөдчисны Вөрса дед да Миша, лэбисны-лэбисны и бөрпуксисны.

— Кытчө нө ми, дедө, воим?— юалис Миша.

Ми воим Дышладорё.

— Дышгъяс тані олоны?

— Да. Со тай пуяс улас куйлоны. Олышт на дінын. Ме регыд бөр локта. Водзё лэбёда сэсся.

Дед кытчөкө воши. Миша матыстчис дышгъяс дінө. Найё куйлісны куньса синмөн, нускисны нырнаныс. Но эз узыны. То өти дыш, то мөд вөрзёдліс кисё либё коксё, бергөдчыліс мөдар бок вылас.

— Доймө нин менам гөгөр, узыны ог вермы,— шыасис медматын куйлысь дыш.

— Лыс чегъяв да вольсав,— вочавидзис сылы медалын куйлысь дыш.

— Дыш меным,— шуис норасысь дыш.

Мыйкө дыра кежлө дышгъяс ланьтлісны. Сэсся бара өти дыш шыасис:

— Кынөмөй сямалё.

— Ветлы да тшак вот,— вочавидзис сылы мөд дыш.— Пуан да миянөс тшөтш вердыштан. Миян өд сямалё жө кынөмным.

— Меным дыш,— шуис тшыгъялысь дыш.

Коли здук-мөд, и бара өти дыш лэдзис гөлөссө:

— Кынми дзикөдз куш му вылад, изөймиті. Ветлөй кодкө песла. Вой локтө. Көнкө узыны ковмас.

— Ачыл ветлы,— вочавидзисны сылы дышгъяс.

— Дыш меным,— шуис кынмысь дыш.

Чөв усылыны та бөрын дышгъяс, но эз дыр кежлө. Өти дыш бара шыасис:

— Балябөжөй сэтшөма лудө! Гыжйыштөй кодкө.

— Ачыл гыжйышт!— скөрысь горөдісны дышгъяс.

— Меным дыш,— шуис лудысь дыш.

Көть Миша и эз жө вөв зіль, но водзё кывзыны татшөм дышгъясөс эз вермы. Өвтыштіс кинас да вешйис бокө.

Недыр мысти воис Вөрса дед.

— Но, аддзылін дышгъяссө?— юалис сійө.

— Аддзылі,— вочавидзис Миша.

— Сідзкө, лэбам водзё. Кутчысь!— шуис дед.

Качөдчисны дед да Миша, лэбисны-лэбисны и бөр пуксисны.

— Кытчö нö ми, дедö воим?— юалис Миша.

— Ми воим Горшладорö,— висьталіс Вöрса дед.

— Горшгъяс тані олöны?

— Да. Со тай катша-рака моз юксöны мыйкö вылын. Олышт на дıнын. Ме регыд бöр локта. Водзö лэбöда тэнö.

Дед кытчöкö воши. Миша матыстчис горшгъяс дінö. Найö буретш сөйисны яя шыд. Сувйисны сöмын, коді мый удитас. Тойласисны, мед матöджык веськавны пöрт дорас. Горзисны вöр тырнас.

Бокынджык кык горш мырддысисны лы вылын.

— Тэ вильöдін нин, вай меным тайöс!— нетшкис асланыс лысö öти горшыс.

— Тэ вильöдін жö. Ог сет!— нетшкис асланыс лысö мöд горшыс.

Вöрысь котөрөн петісны нöшта горшгъяс. Найö абу вевьялöмаöсь воны сөйигкежлас.

— Сөйöмаöсь нин! Ставсö нин сөйöмаöсь! Миянлы абу и кольöмаöсь,— скöралісны сөрмöм горшгъяс.

— Тöрыт ті миянлы энö жö кольöй!— вочавидзисны медбöрьясö панялысь горшгъяс.

Сөрмöм горшгъяс кватитісны пöртсö, кöні пыдöсас вöлыштіс на яя шыдыс, да пышйöдісны вөрö. Мукöдыс вöтчисны на бöрся, весиг мыльöссö эз кöсийны сетны. Лыөн мырддысысь кык горш сöмын колины.

— Ме вильöда!— нетшкис асланыс öтиыс.

— Он! Ме вильöда!— нетшкис асланыс мöдыс.

Миша öвтыштіс кинас да вешйис бокö. Недыр мысти воис Вöрса дед.

— Но, аддзылін горшгъяссö?— юалис сійö.

— Аддзылі,— вочавидзис Миша.

— Сідзкö, лэбам водзö. Кутчысь!

Качöдчисны дед да Миша, лэбисны-лэбисны и бöр пуксисны.

— Кытчö нö ми, дедö, воим?— юалис Миша.

Ми воим Дурккладорö,— висьталіс дед.

— Дуркгъяс тані олöны?

— Да. Со тай вöрасöсь. Олышт на дıнын. Ме регыд бöр локта. Водзö лэбöда тэнö,— шуис дед и бара кытчöкö воши.

Миша матыстчис дуркъяс дінө. Нэмнас нин, буракө, абу шырсылөмаось, сэтшөм кузь юрсиаось вөліны найө. Юрсиныс пратьмөма, кызд омөлик вөвъяслөн бурысьыс, быдсяма сибдан туруныс сэтчө өшйөма. Чужөм выланыс көть эн видзөдлы, няйтыс и саыс — мый сөмын сэтөн абу! Весиг вом дорнысө абу чышкыштөмаось, сёян чиръясыс сибдөмаось вом пельөсыясас. А киясныс пач пөданысь на съөдөсь, варччөмаось мыськывтөмысла.

Дуркъяс буретш лөсьөдчисны пусыны. Пөрт дорыс куим кыза нин лоөма: первой пусьөмсяньыс абу на пожъявлөмаось. Ваыс пөртъяс туй выв гуранын кодь гудыр. Тасьтөпаньыс съөд, кок уланыс туплясьө.

Мишаөс кутис шогөдны: дількмунлас да бара. Вот-вот восөдас. Вешйис өдйөджык бокө.

Недыр мысти и Вөрса дед воис.

— Но, аддзылін дуркъяссө?— юалис сійө.

— Аддзылі,— вочавидзис Миша.

— Сидзкө, лэбам водзө. Кутчысь!

Качөдчисны дед да Миша, лэбисны-лэбисны и бөр пуксисны.

— Кытчө нө ми, дедө, воим?— юалис Миша.

— Ми воим Лёкладорө,— висьталис дед.

— Лёкъяс тані олөны?

— Да. Со эстөнөсь көнкө. Олышт на дінын.

Дед бара кытчөкө воши. Миша мөдөдчис корсьны лёкъясөс. Муртса на удитис сійө пырны вөрө, кызд сійөс конъялісны, да тутис зэв ылө. Миша чеччис, көсийис видзөдлыны, коді конъяліс, но эз удит: веськыда синмас шыбитисны колльөн. Миша сайөдіс чужөмсө, копырөн бөр кутис петны вөрысь. Мыш сайсяньыс сійөс лёкысь тойыштісны. Миша зурасис пуө, зэв ыджыд йөг кайис юр чут дорас. Сійө чайтис, мый мыніс нин, но вөрсьыс петігөн бара на шыбитисны баябөжас кыз увйөн. Миша бөрддзис, а вөр пасьтала вак-вакөн серөктисны. Мишалы сэтшөм забеднө лои, синваыс доршасьны кутис. Но нинөм он вөч: лёкъясыдлысь буртө эн виччысь.

Бөрдыштіс Миша, чышкис синвасө да видзөдліс вөрлань. Пуяс сайсянь век на жерьялісны лёкъяс.

Миша вешйис ылөджык, мед мөдысь оз нөйтны. Лёкъяс

эновтісны сійӧс да кутісны косясьны ас костаныс. Бӧрдӧм и горзӧм — мый сӧмын эз кыв вӧрсьыс. Сэсся лёкъяс кытчӧкӧ ылысмисны.

Недыр мысти и Вӧрса дед воис.

— Но, аддзылін лёкъяссӧ?— юалис сійӧ.

— Аддзылі,— вочавидзис Миша.

— Вот и бур,— шуис дед.— Висътав ӧні меным, кытчӧ кольччан: йӧйяс дорӧ, дышъяс дорӧ, горшъяс дорӧ, дуркъяс дорӧ али лёкъяс дорӧ?

— Кольча?— повзис Миша.— Ме некытчӧ ог кольччы. Ме бӧр гортӧ муна.

— Гортад ӧд зіля велӧдчыны ковмас, мамыдлы отсасьны, мыссьыны быд лун некымынысь, горшасьӧмтӧ вунӧдны, нӧйтны некодӧс оз позы!— лыддӧдліс дед.

— Мед! Мед!— шуис Миша.

— Ме сідз и чайті, мый тэ бӧр кутан вӧзйысьны гортад,— нюмуніс дед.— Ме ӧд тӧда: тэысь коркӧ прамӧй морт на петас. Сійӧн и новлӧдлі тэнӧ, мед гӧгӧрвоин бура, кызди колӧ ӧнісянь нин овны. А то эськӧ эг и лэбӧд бӧрсӧ. А ӧні лэбӧда. Пемдӧ нин со. Мамыд регыд корсьны пондас. Кутчысь, Миша!

Миша кутчысис дедлы тошкас и качис сы бӧрся енэжӧ. Лэбысьяс весьтын дзирдалісны кодзувъяс.

— Дедӧ, а тэ кодзувъясӧдзыс он вермы кыпӧдчывны?— юалис Миша.— Ок, эськӧ кыпӧдчылін кӧ!

— Ог вермы ме, Миша,— вочавидзис Вӧрса дед.— Абу менам сы мында выныс. Ті, мортъяс, ме дорысь вынаджыкӧсь. Тіян ракетаяс эмӧсь. Быдмы ӧдйӧджык, ло зільӧн да сусьӧн. Ачыл лэбзыыв!

— Но!— радпырысь кӧсйысис Миша.

## ЛЫСКО

Педьӧ дедлӧн керка дорас, пӧрысь коз пу улын, эм ичӧтик мыльк. Ми казялім сійӧс мама-нылаӧн ворсігӧн, кор дзесим сэтчӧ. Ӑтияс кутісны шуны, мый мылькйыс артмӧма

эжаон тупкыссьом изйысь, мөдъяс — пу садитом бөрын ко-  
льом му чукорысь, а коймөдъяс мырдон зилисны эскөдны,  
мый Педьо дедо гуалөма сэтчө дона колуй да видзө кулиг-  
кежлас. Кутшөма коть эг вензьой, сідзи өти кывйө эгө и  
войй. Кык детинка заводитлисны паръявны мыльксө, но ни-  
ном эз аддзыны. Сэки кодкө шуис, мый бурджык юавны ас-  
сьыс, Педьо дедыслысь. Та вылын ми бурасим и энөвтим юа-  
лөмсө аскиөдз, сы вөсна мый вөлі сёр нин.

Аскинас ми локтим Педьо дед дорө да суим сийөс кильчө  
вылас. Куран вөлі пуалө.

— Педьо дедө,— шыасим сы дорө.— Төрыт ворсигөн ми  
коз пу увсьыд мыльк аддзим. Мый нө сэні?

Дедө зумыштчис, мыйкө дыра чөв оліс, сэсся ньөжйөник  
шуис:

— Нинөм сэн абу. Мыльк — мыльк и эм.

— Абу тай!— эгө эскөй ми.— Он көсйи висьтавны да,  
дерт. Висьтав но, дедө!

— Висьтавны али мый?— быттьө ассьыс юалис Педьо  
дедө.— Сөмын он өд ті кывзьой.

— Кывзам, кывзам!

— Но, висьтала инөсь,— шуис дедө да видзөдліс ю са-  
йын веж рөмон пөртмасьысь парма вылө.— Важөн нин тайө  
вөвлі. Öні өд со быдторйыс миян сиктаным эм, а сэки, леша-  
кыс төдө, кызди овлім. Ура во кө вөлі, кыйсьылім, а эз кө  
урыс вөв, Уралө, Бөгусловө, пес пилитны ветывлім. Он өд  
кынөмтө тувйө өшөд, нажөткаыд колө. Вот. Öти тулысө коль  
зэв бура артмис. Видз пуктигөн казялім: уркайяс кутисны си-  
бөдчавны миянланьө. Сідзкө, думайтам, и ур воас. Урыд өд  
сийө уркай бөрся вөтчө. Виччысьны дыр эз и ковмы. Кузь  
лунтыр сиктын понъяс кутисны увтчыны. Быд пуын кык, а то  
и куим ур. Семө Васьолы важ ботанас, чипанъясысь лук град  
дорас вөлі пуктылөма да, өти асылө куим ур пырөмаөсь. Бөр  
лэдзалигас Васьолысь, поконицлысь, кисө курччалөмаөсь, да  
вежон көртөдөн ветліс, чөвтны ни нинөм эз вермы. Но, ду-  
майтам, олөм кө лоө, и вөр-ва на таво ар видзөдлам. А ме-  
нам сэки эз вөв понйөй. Уртөмалис кузякодь, да бырөдлі. Ко-  
лө, думайта, пон лөсьөдны, мед не кольччыны йөзсьыс. А ко-  
ді нө ура воө бур пон вузалас? Некод оз. Кымын сиктө коть



эг волы, некысь эз сюр. Медбөрын Тыдинө кайи, тасянь верст квайтымын лоё. Индисны өти нывбабаёс: сылөн пө пон эм, ар куима кымын, ачыс пө оз кыйсы, а верөсыс пө кули, и гашкө, пө вузалас. Муні ме нывбаба дорад. Сёрнитчим. Вузалис сійө меным понтө. Көрталі ме көвийөн Лыскоёс (тадзи нимтылөмаось понсө) и мөдөдчи гортө. Но и мучитчыны жө ковмис меным. Ме кыска, а сійө оз лок, пыксё нельнан кокнас, эргө. Некодлы өд гортсыд абу окота муннытө. Мыйкө и ме вайөді жө сійөс! Но нөйтны эг нөйт, эг вид ни, мед лёк морт пыдди менө оз пукты. Вайөді да дом йылын видзи: пышійөмысь на өд полан. Воа вөлі удж вылысь да медводз сы дорө: верда, малала, нимнас ыдждөдла. Вот и велалис ме динө: өд тэ кө бур, и сійө бур. Аскөд кути уджаланинө босьтывлыны. Қолян вөлі пажынтө, да, көть лунтыр тшыг олас, оз жө вөрзёд, оз жө исышт.

Педьө дедө кильчө бокө пыркөдіс кусөм каллянсыс пөимсө, вылысь пестіс да зэв горша гоз-мөдысь нылыштіс табак тшынсө.

— А сэсся?— тэрмөдлім ми сійөс.

— А сэсся ар воис, ур кыйны Лыскокөд петім. Зільсыс зіль вөлі сійө, оз бара ков ыстыны дінсыд, мед мунас да коряс уртө. Кузь лунтыр котралө-визъялө, шойччөг оз төдлы. Мунан ордым кузяыд — да өтарас петкөдчылас, видзөдан — да мөдарсянныс нин локтө. Қомын куим урөдз увтывліс. Мукөд кыйсысыс вөлі дас витөс, зэв нин кызьөс медунасө лыяс, а ме дас вит-кызь уртө этша лун вайлі. «Му увсыс кө нин корсө-а?»— унаысь думайтывлі. Сюсь пон вөлі, ой, сюсь! Отчид менө кутшөма на янөдіс!

— Кыдзи янөдіс?— пөшти өттшөтш горөдім ми.

— Сідзи жө,— вочавидзис Педьө дедө.— Локта вөлі чомійө. Ывлаыс рөмыд нин. Лыско друг увтны кутіс. Час, кезжала: оз тай ылысь увт. Кежи, видзөда пуяс костөдыс, да зэв күзь сук козыйысь увтө. «Тась нө, Лыско, кызд кыям?»— шуа сылы. А сійө видзөдліс ме вылө да аслысногөн увтыштіс, быттьө шуис: «Қыям!» Қытшовті ме коз гөгөрыд өтчид дай мөдысь, но нинөм эг аддзы. Быд ув-вож өткодь сьөд, дай — ставыс. Перйи козъянысь черөс, тышки — бара жө некысь некод эз вөрзьи. «Пуалис кө, Лыско, урыд-а?»— шуа. А Лыс-

ко увтö и увтö, ярысла козйыслысь кырсьсö нетшкö, улыс увъяссö öддзöдчылöмөн чегъялö. «Эновт, шуа, Лыско, абу öд медбörья ур». Чукöстi сийöс, а сийö вöтчöм пыдди меным сöмын бöжнас люг-лег вöчис. Но, думайта, кынöмыд кутас сюмавны, да локтан, корöм оз ков. И мунi чомйö. Думайтан-ныд локтис? Вот сийö и эм, мый эз. Асывнас, югдандорыс пети чомйысь, кывзысьышти: увтö! Дерт, гежöда и омöльджыка, мудзöма жö, тыдалö, войбыднад, но ён гөлöса вöли, да бурна на увтöмыс кылис. Зэв öдийö пасьтаси, сёйышти и мунi веськыда сы дорö. Видзöда да, век на сийö козсьыс увтö. «Но, мокастьö, думайта, ур вöсна кө понйöс этатшöма мучитöма лои, и дивö».

А ывлаыс поводнöя нин югдiс, сöмын рытиввылын кымынкö кодзув чусалисны на. Бара кытшовти коз гөгöрыд, бара нинöм эг аддзы. «Понсö вомдзалисны кө-а, и менö тшöтш?»— думайта. Бурджыка видзöдны кутi, коз йывсяньыс синмөн заводитi лэччыны и шөрвьяс кымын, медся сукинсьыс, аддзи сёдоват ёкмыль. «Мый лоан ло, думайта, лыйла, а сэсся öд мыйкö тыдовтчас». Окти пищальöс, метитчи ёкмыляд и лыйи. Ёкмыльыд, видзöда да, доровмунi, уси улыссаджык ув вылö, сэсянь нöшта улö— и Лыско вомö. «Шыть!»— горöдi да босьти, мый усис.

— А мый нö усис?— ставөн ми вөрзим места вылысь.

— Тулан! Вот мый усис! Шылыд пемыдвиж гöна, ыджыд, мича, көть веськыда сыли гөгöрыд гартышт воротник пыдди. «Но, пасибö зэв ыджыда,— шуа Лысколы,— тайö буртö ог вунöд». А сийö пуксис меным паныд да кутис видзöдны веськыда синмам, быттö көритис менö: «Эн эскы меным, а не кө ме, пышйис эськö туланыд, эгö и аддзылöй». И меным збыльысь сэк яндзим лолi. Вот. Сюсь вöли понйыс, ой, сюсь! Этшаöс корсян öнi сэтшöмтö. Дас во ме дорын олис да öтчыд эз тыртöмад увтлы. Ог лысьт кулитны, сёлöм оз лэпты.

— Сэсся нинöм эз и вöвлы?— юалим ми.

— Мыйла эз вöвлы? Быдторйыс вöвлi. Ошкысь унаысь мездылис и.

— Висьтав но, Педьö дедö!— кутим ми дзайгыны.

— Кутшöм ош кыйöм тiянылы и висьтавны? Первойсö кө нин-а. Сэки аслам повзылöмыс лои. Но, муним ми Лыскокöд

ош кыйны. Арнас на казьявлі водан местасо да лосас вочлі. Вот сійо лосас кузьяс и воим гу дорас. Ме водзвыв перйи кузь зіб да тувки помнас гу розяс. Ошкыд, кор водас, пыран местасо коть и тыртыштас ув-эгон да корьясон, но лолавнысоз розь коляс. Тайо розьяс товбыд оз тупкысылы, коть мый джуджда лымьялас, сы восна мый гусьяс шоныд ру пето. Вот сэтчо и тувки ме зіб помнад. Лыско сулаліс ме дорын. Кор ошкыд мыччысис, уськөдчис сылы воча да чеччыштіс боквыв, мед ошкыс, сы выло ыштөмон, оз казьяв мено. Ошкыд абу на йой. Казьяліс мено, равөстис, йөткыштчөмон вузьөдчис ме выло. Ме пезьдөді куроко. Тэрмасигад менам сувтсьома веськыд кокон лымйон тыром коз поноль выло. Буретш лыйигон и лайкмуни понольыд. Инми ме ошкыдлы эг юрас, а сомын косялі пулянас шоша вывсо. Ошкыд равөстис воддзасьяс на лөкысь, чеччыштіс боквыв да пызйыштіс мелань. Сэн, гашко, менам и помой вөлі. Од черос коть и кыски, чернад енатө он на водзсась, а пищальой өти ствола. Кор зарадитан? Ыркмуни, быттьо кодзыд ва ведра вылысо кыстысны. Но шудыд менам вөлома на. Лыско сувйыштіс ошто борсяныс кокчорас. Ошкыд бергөдчис, косийс тшапнитны Лыскотө, да он босьт: абу од чурка, оз места вылас сулав! Сэк кості ме выльысь зарадиті пищальос и помалі ошто. Пукси ме ош вылад да чигарка гартышти, а Лыско вирсо нюліс. Пасибө шуом пыдди косий ме сійос малыштны, а сійо оз сетчы, весиг эргыны кутіс ме выло: абу на, вөлөмкө, став скорыс петома. Вот и ставыс. Тырмас али оз на?

— Ещө, ещө!— кевмысим ми.

— Мый нө эськө нөшта тьянлы висьтавыны? Но Кырйылын узьлім.

— Кырйылын?— чуймим ми.— Муяс вылас?

— Сэк эз на вөвны муяс, вөр на сәні сулаліс. Сійо од тьянлы кажитчө, быттьо нэмсө нин муяс.

— Мыйла нө гортаныд эн локтөй, сэтшөм матын кө вөлінныд?

— Эг төд ме, мый матын вөвсьома менам. Биясыс эз тыдавын-а. Жугалі маткаөй, компасөй, өнія ногон кө, шонді серти ковмис локны. Локті-локті ме кыйсигмоз веськыда вөрөдыс, да эг и төдлы, кызд пемдіс. Көсьян он косий, а узь.

Содтөд нөшта слөтитны кутіс, вежсис вой улас поводдяяс да. Пөрөді ме кос конда, ороді кражъяс вылө, ноддя вөчи коз улө. Думайта пукалігмоз, мися, буракө, мунсис бокө и аски лунтыр на шөйтны ковмас. А, вөлөмкө, вөрө катөдысь туйыс кызь воськов сайын и эм. Сыланьөсө ме эг ветлы, да эг и төд. А Лыско эськө төдіс, да висьтавнысө эз куж. Сійө, гашкө, и дивитіс менө ас думсьяс. Войбыд ми терпитім ськөд слөтсө. Мый эськө вөлі лэччыны сылы гортө да шоныдінын узьны, но эз мун, эз коль менө өтнамөс, а водіс да мекөд орчөн войсө колляліс. Мукөд мортыс тадзсө оз вөч. Вот.

Педьө дедө бара пестіс каллянсө, чөскыда кыскыштіс курыд табак тшынсө.

— А гу йывсьыд эн висьтав да? — кватитчим ми.

— Гу йывсьыд?! Но, кывзөй нин, сідзкө, помөдзыс. Оліс Лыско ме ордын дас во, кувтөдзыс, өти кывйөн кө. Көть пон, а семья пытшкын вердысьөн тшөтш вөлі. Лөкөс сы йылысь нинөм висьтавны ог куж. Зато мясянь өтитор вөлі, кодысь өні на яндзим. Пөрысьмис Лыско, ныриссө воштіс, морт моз кутіс восьлөн ветлөдлыны. Мыйла, думайта, видзны? Катөда вөр дорө да лыя. Думыштнытө кокни вөлөм, а лыйнытө и эз лэпты сьөлөмөй. Катөді ме сійөс, домалі понөль бердө, ылыстчыны куті. А сійө никсө да нетшкысьө. Көнкө, чайтіс, мый ме кыйсьыны муна, а сійөс ог босьт. Сувті сы весьтө, окті пищальөс, веськөді стволсө юрас. Сэк Лыскоыд менам и гөгөрвоис, мый ме көсья вөчны. Ланьтіс, дугдіс нетшкысьнысө, пуксис да прөстаысь мыжалан морт моз кутіс видзөдны ме вылө. Көсий нин лыйны, но сэк менө друг босьтіс көдзыд йирмөг, киясөй кутісны тіравны, синмөй лапъяліс. Сулалі-сулалі ме и лэдзи пищальөс. Лэччөді Лыскоөс бөр гортө. Оліс во кымын на да кулі аслас смертьөн. Кодий сылы гу, вольсалі лыскөн и гуалі тайө пөрысь коз улас.

## ЗООПАРКЫН

Уна пөлөс ловья лов  
Зоопаркын олө.

Найөс видлытөг ог ов,  
Кадысь кадө вола.

\* \* \*

Каньлөн кодь дзик юрыс,  
Сылы вылас бурысь.  
Клетка пөлөн шөйтө,  
Бөжнас асьсө нөйтө.  
Тодны абу сьокыд зэв:  
Тайё — лев.

\* \* \*

Вомыс пач вомысь на паськыд,  
Унджык сёян сылы дасьты.  
Госсялөма — өдва вөрө.  
Мышку вылас дасөн төран.  
Сэтшөм кыз — мед оз жө пот.  
Тайё — бегемот.

\* \* \*

Дурө, некор весь оз ов,  
Сёрйөд чеччалө, оз пов.  
Весиг увлань юрөн өшъяс,  
Сөмын кутчысьома бөжнас,  
Векиштчылас тэныд паныд.  
Тайё — обезьяна.

\* \* \*

Бытьё, ыджыдөс да шаньёс,  
Кутөмаоьс кыськө каньёс.  
Пөт, оз вильөд пуктөм лысө.  
Лапаясыс пескыс кызёсь.  
Оштө бара вермас дзик.  
Тайё — тигр.

\* \* \*

Турунвиж и сьодов рөма,  
Лампа улө сюркмунөма:  
Сылы сэтөн помся гождөм.

Кывсө мыччылас да — вожа.  
Ачыс кызджык тэнад сойысь.  
Синнас веськыда дзик сёйө.  
Бур, мый куйлө стеклө сайын.  
Змей-питон.  
Вот коді тайё.

\* \* \*

Кынөм улас йөртөд ичөт,—  
Муса писө сэтөн видзө.  
Чеччалөмөн ветлө-мунө:  
Лыбөдчылас, сэсса сунө.  
Өдздөдчас кө, он и су.  
Тайё — кенгуру.

\* \* \*

Лөз, и гөрд, и зарни рөма,—  
Став лэбачсьыс мича гөна.  
Ыджыд бөжсө паськөдас кө,  
Он и аддзы сэки асьсө.  
Тэлань оз и чөвтлы син!  
Мыйся лэбач нө?  
Павлин.

\* \* \*

Аддзан төдлытөг кө, повзян:  
Бытьё мойдысь гундыр  
ловзьём  
Вомыс ыджыд, бөжыс пиня,  
Синмыс вирдалө, оз инась.  
Куйлө — гашкө, кык сыв кузя.  
Крокодилөн шусьё.

\* \* \*

Еджыд, сылыыс зэв кузь,  
Ылісянныс бытьё юсь.  
Локтан — аддзан: ыджыд ныра,







Уна пӧлӧс ловъя лов  
 Зоопаркад олӧ.  
 Найӧс видлытӧг ог ов.  
 Но и ті тшӧтш волӧй.

## ПӦРЫСЬ КАГА

Таня тыртӧ витӧд ар.  
 Витӧд ар, но вывті няр:  
 Мыйӧн чеччас вольпась вылысь,  
 Сӧмын бӧрдӧм кылан сылысь.  
 Бӧрддзас:— Коді менсьым улӧс  
 Йӧткыштӧма пызан улӧ?  
 Носкисӧ кӧ нуас кань,  
 Сэк нин ещӧ дыр оз ланьт;  
 Кӧмыс кокас кӧ оз пыр,  
 Нырӧсӧ нюжйӧдлас зэв дыр;  
 Бӧрддзас, мыссигӧн кӧ синмас  
 Майтӧг быгтор муртса инмас;  
 Сӧйигӧн кӧ сотас рок,  
 Сэк нин ещӧ лоӧ лӧк.  
 — Пӧрысь кага!— шуас мамыс,—  
 Весиг сӧйныд абу сямыд...  
 — Абу кага ме, а Таня!—  
 Нывка грӧзитыштас паньнас  
 И, кор прӧйдитас здук-мӧд,  
 Шуас:— Ме ӧд ог нин бӧрд.

## МЫЙ ЛОӦ

Сійӧ ветлӧ тӧкӧд тшӧтш,  
 Либӧ видзӧ горттӧ.  
 Бӧрӧн лыддян: овлӧ век  
 Мышкас туй выв мортлӧн.  
 (пон — пон)

Сійӧ увтасінысь кайӧ,  
 Кӧні эмӧсь тыяс, ёльяс.  
 Бӧрӧн лыддян: ӧдийӧ-ӧдийӧ  
 Пуӧ кайӧ, сӧйӧ кольяс.  
 (ру — ур)

Ворсігчөжөн тайё кывсё  
Унаысь ме шула тэд.  
Бөрөн лыддыны кө, лоё  
Бөрын олысь мудер зверь.  
(чур — руч)

Сійё быдмё шоныдінын,  
Сыысь пулам чөскыд рок.  
Бөрөн лыддыам — лоё чери,  
Коді ёсь пиня да лёк.  
(рис — сир)

## ТЕШКОДЬ СИКТ

Өти сиктын —  
Көн, ог ликты —  
Лоис тешкодь-тешкодьтор.  
Потшөс вывсянь  
Уси пывсян,  
Нора бөрддзис кыз пу зор.

Пёрысь петук  
Вурун летіс,  
Сера чипан көтіс нянь.  
Лабич вылын,  
Мыйкё сьыліг,  
Ыджыд пестер кыис кань.

Тайё мый на?  
Утка кыйны  
Мөдлапөлө вуджис меж.  
Йёрын чожа  
Йёктіс чошө,  
Весиг мөслөн петіс веж.

Зумыд шагөн  
Ылыс ягысь  
Лэччис сиктө пожом пу.  
Чайтад, сөра?  
Лыддьом бөрад,  
Өні мый көть меным шу.

## ПОРСЬ СЕРАМ

Коля кайис садса пуё,  
Чеччыштіс, но эз во муё,  
Өти ув сэн чеги — трач!  
Мөдө пысасис важ гач.  
Кыз көть сійё эз пес вын,  
Увйысь сылөн гач эз мын.  
Локталісны сэтчө порсьяс:  
«Мый пө тайё мортыс корсьө?  
Мыйла увлань лэдзөм юр,  
Али тадзё сылы бур?»»

«Аслад вильышлунла дзугсин,—  
Медся пöрысь порсьыс руксіс,—  
Шуа тэныд, кöть ме порсь,  
Бордтöг лэбавны оз позь».

## ШАРИК ДА ТУЗИК

Шарик да Тузик,  
Сиктысь кык пон,  
Воисны спорö,  
Коді медьён.

— Ме!— шуö Шарик.

— Ме!— шуö Тузик.

Пузис сэк Шарик,  
Тузик тшöтш пузис.

Лэптисны щöтьсö,  
Кыкнанныс — яр.  
Ывлаын сöмын  
Кылö вур-вар.

Лыско сэт вöлі  
Котöртö маті.

— Мый нö нин,— шуö,—  
Юканныд татөн?

Лэдзисны щöтьсö  
Пурсьысь кык пон:  
— Спорö ми воим,  
Код медся ён.

— Ме!— содтіс Шарик.

— Ме!— содтіс Тузик.

Пузис сэк Шарик,  
Тузик тшöтш пузис.

Лэптисны щöтьсö,  
Кыкнанныс — яр.  
Ывлаын бара  
Кылö вур-вар.

Скөрмис сэк Лыско:  
— Дугданныд онö!  
Ветламö вөрö,  
Зэв кö нин ёнось.

Вöрас ме вöлі,  
Кöин дук кылö.  
Ме чайта, эз на  
Пышйы зэв ылö.

Мунамöй öдйö.  
Туй тан эм веськыд!  
Видзöдö Лыско,  
Аслыс оз эскы:

Тіралö Тузик,  
Бытьёкö кынмö.  
Шариклөн бöжыс  
Кынёмас инмö.

# КЫВПЕСАНЪЯС

Перыд Педөр  
Ветліс недыр.  
Вайис Педөр  
Ки тыр сэтөр.



Пуыс сись,  
Пуас сизь.  
Пусө сизьдө,  
Розыыс письтө.



Йөрүн,  
Шөрүн,  
Полөкалө.  
Полөкалө  
Вөрышталө.



Руксө порсь,—  
Он на-й корсь.  
Гөгөр няйт,—  
Он и чайт.



Сюра мегө,  
Бөжыс легө,  
Өти сурыс  
Регыд чегө  
Люкасьөмысла.



Кикуруллю —  
Сьылө гулю.

Баксө кычан,  
Увтө меж.  
Оз кө лөсяв —  
Ачыд веж!



Тасьті-пань.  
Черинянь.  
Чери корө  
Сера кань.



Шоныд гожөм,  
Шоныд рыт.  
Шуим пуны  
Шома шыд.



Пызан сайын  
Сөйө Коля.  
Пызан сайө  
Ставсө коляс.



Татшөм вөрад  
Тшакыд эм.  
Татшөм вөрад  
Тшакыд тшем.



Дзирья дорын  
Дзөля чибө.  
Сэтшөм мича,  
Но оз сибөд.

## ЮРИНДАЛЫСЬ

Гөрд флага му . . . . .	3	Нявда . . . . .	34
Школаё . . . . .	3	Петя . . . . .	35
Дружба . . . . .	3	Машина . . . . .	35
Пионер . . . . .	4	Ачым тōда . . . . .	36
Менам эмōсь ёртъяс . . . . .	4	Рōмпōштан . . . . .	37
Ми — октябрята . . . . .	6	Сквореч поз . . . . .	37
Сійō вайис победа . . . . .	6	Коля шогмō космонавтō . . . . .	38
Граница . . . . .	8	Тыра пестер . . . . .	43
Ленинлōн гōснеч . . . . .	8	Пурта трактор . . . . .	44
Сержант Сажин . . . . .	12	«Ныв кō вōлі...» . . . . .	44
Сōстōм дōрōм . . . . .	18	Буско . . . . .	46
Чери . . . . .	22	Кōдзыд лун . . . . .	47
Надя да Лōзук . . . . .	25	Исласьōм . . . . .	48
Миян сиктын . . . . .	26	Виччысьтōм шог . . . . .	50
Видза колян, шоныд гожōм . . . . .	26	Йōктысь кōч . . . . .	51
Велōдчы . . . . .	26	Кōнн . . . . .	51
Быттьō карын . . . . .	27	Васька кань . . . . .	52
Нывкалōн висът . . . . .	27	Вōрса дед да Миша . . . . .	54
Ог кольччы вокысь . . . . .	28	Лыско . . . . .	63
Талун празник . . . . .	28	Зоопаркын . . . . .	69
Первомай . . . . .	28	Пōрысь кага . . . . .	74
Мамō, эн вид . . . . .	30	Мый лōō . . . . .	74
Иван да ми . . . . .	30	Тешкодъ сикт . . . . .	75
Менам Серко . . . . .	30	Порсь серам . . . . .	75
Мый, кōть и вōтаси . . . . .	31	Шарик да Тузик . . . . .	76
Ыджыд нин . . . . .	31	Кывпесанъяс . . . . .	77
Артасьōм . . . . .	32		

**Юшков Г. А.**  
**Ю 86** Тыра пестер. Кывбуръяс, сыланкывъяс, висътъяс, мойдъ-  
яс, нӧдкывъяс, серамторъяс, кывпесанъяс. Коми кн. изд.,  
Сыктывкар, 1980.

80 лб.

Коми писатель Геннадий Анатольевич Юшков, «Чугра» романлӧн, повестьяслӧн, пьесаяслӧн автор, кадысь кадӧ гижавлӧ и челядылы. Тайӧ книгаӧ пыртӧма и кывбура гижӧдъяс, и прозаӧн гижӧмъяс — висътъяс, мойдъяс, пьеса. Гижысьыс петкӧдлӧ ёртасьӧм, ас чужан му радейтӧм, удж дӧнӧ сибӧдчӧм, серпасалӧ ывла выв. Гижӧдъясыс то зумышсь, то серамбанабсь, велӧдӧны бурӧ, ышӧдӧны венны сьӧкылунъяс.

Ю  $\frac{0762 - 010}{M 128 (03) - 80}$  43—80 м

С (Коми)

© Коми книжнӧй издательство, 1980.



*Для младшего школьного  
возраста*

Геннадий Анатольевич Юшков

**ПОЛНЫЙ ПЕСТЕРЬ**

*Стихи, песенки, рассказы,  
сказки, загадки, прибаутки,  
скороговорки*

На коми языке

ИБ № 333

Художник **В. Г. Игнатов**

Редактор В. А. Попов. Художественный редактор А. Н. Вишнева. Корректор А. А. Надуткина.

Сдано в набор 10.08.79 г. Подписано к печати 31.01.80 г. Формат 70×90<sup>1/16</sup>. Бумага № 1. Гарнитура литературная. Печать высокая. Усл. печ. л. 5,85. Уч.-изд. л. 4,34. Тираж 5000. Заказ № 71. Цена 15 коп. Коми книжное издательство. 167610, г. Сыктывкар, Дом печати.

Республиканская типография Госкомитета Коми АССР по делам издательств, полиграфии и книжной торговли Совета Министров Коми АССР. 167610, г. Сыктывкар, Коммунистическая, 20а.



15 коп.

КОМИ КНИЖНОЙ ИЗДАТЕЛЬСТВО 1980